

摘藻堂四庫全書薈要

集部

欽定四庫全書薈要

集部

明詩綜卷三十



詳校官編修臣王天祿

欽定四庫全書薈要卷二萬五百三

集部

明詩綜卷三十

翰林院檢討朱彝尊編

周 二十一首

周字啟南長洲人景泰中郡守以賢良應詔辭

不赴有石田先生集

文徵仲云先生詩但不經意寫出意象俱新可稱妙

絕一經改削便不能佳何元朗云石田詩有絕佳者但為畫所掩世不之稱王元美云石

田詩如村童唱榜歌亦自清雅可聽一歌滄浪便無餘興



靜志居詩話石田詩不專仿一家中晚唐南北
宋靡所不學每於平衍中露新警語人既貞不
絕俗詩亦變而成方惟七言律詩差少全璧句
如明河有影微雲外清露無聲萬木中落木門
牆秋水宅亂山城郭夕陽船竹枝雨暗蠨蛸戶
豆葉風涼絡緯籬剪取竹竿漁具足撥開荷葉
酒船通牆凹為避鄰居竹圍熟多分路客瓜酒
醉又移花下席書多別起竹間樓青山一枝付
歸客玉洞千花留故人竹裏行厨青玉案酒邊
官妓茜紅裙片帆南浦草仍雨斗酒長亭花又
風歲晏雞豚鄰杜鼓秋深鰕蟹水鄉船芭蕉夜
雪闌新興蛺蝶春風卷畫圖明月未來風滿樹
夕陽猶在鳥無聲蘼蕪細雨山連郭翁翠斜陽
水滿川野色迎人過橋去春風吹面傍花行所
謂詩中有畫者非邪昔郭熙撰林泉高致具撫
唐人之句取可入畫者授人若翁之詩即此亦

圖之不
盡也

游張公洞

仙山不在高靈區設中菁包蒙自太古霹靂始開牖閤
然不耀地白日已通晝遂褻世游人我及千載後登頓
入地中足與石角鬪飛厓臨紫雲既掀勢還覆仰面欲
成壓山鬼自司救元氣不蒸雨五色變乳溜支本萬不
齊纂纂簪筍瘦又如人披腹呈此琅玕秀菊扉表雲房
曲密通款竇跬步必容炬老膽怯且逗神仙未易求冥

探亦何遺矯手采瑤華和飲千日酌聊度三千年擬與石同壽

七星檜

海虞七星檜宜為羣木冠列生老子宮與邑作竒觀廣
墀氣蕭森入門凜欲汗久信天地成沃知雨露灌傳植
從蕭梁其說我恐漫驗斗形叵全七既斃其半三株寔
聊存難執歲月算各各具一異形容匪詞翰西體裂多
稟豁然敞三判東體活亦裂筋骸互續斷北者蝻而禿

袖破舞脫腕葉亦不暇葉幹亦不暇幹左文皮索絢孤
莖頂留繖槎折象齒躑躅決鬼目爛疏越復叢穴骸骸
仍軒岸蛟孽及猊跛努力不得窺牙長及劔短接戰驚
楚漢如此紛怪駭聃君不能按知遭幾雷厄還屢兵火
難生死付冥然造物反被玩君子重貞固頑醜小人調
緣高坐吹簫我欲呼鶴鶴從根覓薶丹澆泉覲紅燦長
生就其蔭永作婆娑伴

二月八日過靈殿祥公房

理舟指南郊迢迢及側景中塗止溪寺陶烟接村暝門
前見新月步步踏松影虛寮寂無風已有孤燭耿衲子
供爐香其意似有請草草成數行狂書亂斜整復作挂
猿枝墨瀋帶雲冷但記此經過流傳我何省

西山有虎行

西山人家倚山住唱歌采茶山上去下山日落仍唱歌
路黑林深無虎慮今年虎多令人憂遶山搏人茶不收
牆東小女膏血流村南老翁空髑髏官司射虎差弓手

自隱山家索雞酒明朝入城去報官虎畏相公今避走
古梅折枝歌

猾蛟不肯居西湖穹窿山中潛作都千年雜與草木處
土膏沁骨蒼皮麤雪中攀拳凍欲死腊乾又仗春風蘇
今年苦遭斤斧厄左股割落從樵夫幽靈暗泣天亦黑
十斛清淚含明珠抱材肯受虐下辱失勢豈分溝中污
韓湘直費百金買何啻網著青珊瑚挑回市上駭衆目
兒女爭看來喧呼還疑神物有變化白日閉戶防逃遁

金繩兩道鎖紐壯禁止更插碧玉壺主人尚恐莫長守
請我寫作流芳圖高堂雪壁照清影此屋此圖何可無
竹堂寺與李敬敷楊啟同觀梅

竹堂梅花一千樹晴雪塞門無入處秋官黃門兩詩客
珂馬西來為花駐老翁攜酒亦偶同花不留人人自住
滿身毛骨沁冰影嚼蕊含香各搜句酒酣塗紙作橫斜
筆下珠光濕春露明日重來花有無只愁此紙卷春去

題光福畫卷

羣山西奔駐湖尾通川夾山三十里川窮小瀨開鏡光
居民次水屋比比屋上有山屋下水開門波光眼如洗
虎山橋畔晚市忙打鼓漁郎賣鮮鯉霜前橘袖萬包黃
雨後楊梅千樹紫山圍水抱開農桑樂土風光真畫裏
三年潢潦我無家恨不攜書亦居此

苦雨寄城中諸友

新雨似舊雨今年即去年只愁沈屋土失喜夢青天頓
頓黃壑甕家家白鷺田惟應五穀地改納水衡錢

溪亭小景

幽亭臨水稱冥棲
蓼渚莎坪只尺迷
山雨乍來茆溜細
谿雲欲墮竹梢低
檐頭故壘雌雄燕
籬脚秋蟲子母雞
此段風光小韋杜
可能無我一青藜

葛嶺

閒堂寶閣畫圖中
天乞湖山養相公
正是襄樊多事日
却將征戰試秋蟲

和吳匏菴姚氏園池

雨後春池漫石磯
櫻桃梅子兩爭肥
東風試放諸生假
閒就滄浪浣舊衣

題畫 四首

草房仍著薜蘿遮
地拗林深獨一家
只道春風吹不到
門前依舊有梅花

嫩黃楊柳未藏鴉
隔岸紅桃半著花
如此風光真入畫
自然吾亦愛吾家

楚江秋淨水沄沄
江上青山多白雲
手把蘋花却惆悵

無人作伴賽湘君

碧水丹山映杖藜
夕陽猶在小橋西
微吟不道驚溪鳥
飛入亂雲深處啼

白頭公畫

十日紅簾不上鈎
雨聲滴碎管絃樓
梨花將老春將去
愁白雙禽一夜頭

杏花

半抱春寒薄染烟
一梢斜露曲牆邊
東家小女貪妝裹

聽買新花破曉眠

客有餉河豚者畫雙玉圖酬之

有客來從海上村
早潮新喜得河豚
齊穿青篾一雙玉
侑我田家老瓦盆

越水圖

記別錢唐二十年
夕陽山色曉潮邊
隔江千里美人遠
夢落西興舊渡船

五柳莊圖

花開爛熳屬秋風滿地黃金醉眼中千古陶潛晉徵士
乾坤獨在此籬中

溪山落木圖

溪山落木正蕭蕭野客尋詩破寂寥一路夕陽秋色裏
不知吟到段家橋

史鑑二十首

鑑字明古吳江人有西村集

吳原博云明古詩
不屑為近體冥搜

苦索直欲追
魏晉而及之

詩話西村才名亞於石田然以詩論刻意學古
似當勝沈一籌其述曾祖仲彬行狀止云推擇
為稅長先民質實不誣其祖若是其後致身錄
出始云授翰林院侍書浸假而直文淵閣矣浸
假而擢翰林院侍讀學士矣浸假而稱浸後建
文帝有御製文易名曰忠獻矣常熟顧氏吳江
潘氏先後辨其妄近有司
祀于藝宗此當考實者也

謨無猷邀飲於南虛室讀壁間馮明府詩有感

獨客因泥雨閉門愁索居天晴氣微和欲出嗟無與鄰
僧念孤寂招邀過精廬緒風泛林條溜水鳴階渠良友
四五人壺觴聊爾娛陶情非絲竹冥心遊古初為樂苦

不常奈此年歲徂一適非偶然且復少躊躇興懷舊遊
者由來心迹俱風波一分散判然區域殊精神莫與通
夢寐時交胥願言比浮雲隨風往微軀

韜光菴

韜光古精舍遠迹西山岑岡岫屢迴複雲嵐杳深沉流
泉激脩竹綠蘿被芳林密葉翳朝陽芳柯承夕陰杖策
遵微徑逝將支遁尋行行未易即遙聞鐘磬音徙倚絕
塵想冥思詣道心寧芳詠招隱松風和悲吟

贈汝其通

江南有淑女婉孌美清揚芳馨振微風容華耀朝陽被
服鮮且麗不殊古姬姜蹇脩來何遲幽獨處蘭房匪無
室家願夙以禮自防一朝君子求玉帛以時將御車盈
百兩道路宛生光和鳴合琴瑟宴衍吹笙簧顧茲待年
者後處諒無忘

飛來峰

久圖山澤遊苦為風雨款驚雷破重陰及晨光已顯透

迤入幽深厲揭度清淺靈山傳飛來合澗互回轉蘿垂
手可捫松高蓋恒偃陽厓丹霞凝陰洞蒼雪滿秀色如
可攬絕巘竟誰棧衆竅因風號羣芳遲春行追念平生
歡歷歷猶在眼匪無新相知已少舊遊伴老僧久見招
相攜集閒館解衣任盤礴覽物適蕭散形忘慮則消情
至心莫展寄言同懷人對酒歌勿緩

落景村

義和駕馭驥杳杳經天衢向夕迫崦嵫弭節少躊躇餘

光爛未收冉冉下桑榆
歸雲棲遠岫暝烟生廢墟
野雉雖中林牛羊下城隅
回風忽復來灌木吹笙竽
野老耦耕倦盥濯歸茅廬
曳杖數雞豚引水灌畦蔬
達人尚真意寫圖聊自娛
天機宛流動匪為形似拘

送劉德美之京

風吹大河水晝夜無停流
嗟君萬里行且復須臾留
王命自有程安能顧朋儔
執手兩茫茫日暮登行舟
皇家重賢材一藝咸見收
况茲衛生功妙與元化侔
譬彼照

乘珠所往無不售叶願言進明德流光被中州

十八日登含虛閣

員景光漸闕海溢秋生潮禪林敞高閣勢欲凌雲霄老
僧敬遠客良夜相招要焚香足清供舉酒聊逍遙河漢
西南流微風忽刁調夜氣悄且清川原何寂寥悠然動
遐思凭闌發長謠商聲出金石餘音一何嘹願隨瑤臺
鶴高舉乘飄颻

支硎山人

幽人戀墳墓構此山澤居層巒代屏障積石當階除飛
泉漱瓊瑤靈籟鳴笙竽清音度回風頽響棲芳株入耳
盡成曲喈喈良不殊臨軒睇冥鴻坐石見游魚飛潛各
有適悠然忘所如緬懷放鶴人不得同交娛商歌滿天
地如與金石俱富貴非吾欲逍遙真有餘

送郭訓導

仲秋百卉腓旅鴈思南翮涼風吹客衣嗟君事行役三
調不徙官依然在儒籍皇朝重文教此任故精擇諸生

得造就疑義資剖析入室與升堂煌煌盡珪璧冷熱固
人情於君自無斲浩歌菁莪篇芳塵滿瑶席

三天竺

浮屠善幻化利益誇羣愚未能空諸有亦復從其居魏
魏金銀宮湧出空山隅興廢固由人無乃法所驅眷茲
天竺名古來荒夏殊移之被此地欲表神靈區地勢既
形勝人情亦奔趨我來適閒曠二三同志俱登頓雖云
勞逍遙還足娛仰睇羣峰秀俯循流水迂微風動靈籟

滿耳聆笙竽徘徊日將暮浩然賦歸與

贈李中翰貞伯

層城多甲第朱門赫峩峩曲水起飛橋樓觀相陂陀何
人拊瑤琴獨坐當中阿朱絃激清商慷慨和悲歌回風
振叢薄游魚躍靈波大雅久不聞舉世尚淫哇知音既
云少笑者亦已多沉吟下階陞感歎將如何

題可菴老人寫竹

國初寫竹王舍人筆端生動妙入神風流太常繼其後

片紙一出人爭取可菴老人得此傳聲價在人尤赫然
江南賢豪動百數家家屏障生風烟前年寄我雪竹圖
天地黯慘雲糝糊大枝橫斜小枝亞金鞭擊折青珊瑚
今年寫竹吳江縣寫出千人萬人羨鸞鳳盤空雲日翻
蛟龍出海風雷變鷓鴣無聲錦瑟稀湘娥披雲未遮面
老人老人勿自珍筆力轉多方絕倫高山流水志有在
莫謂識曲無其人

過橫塘

西向橫塘過風涼天又晴兩山沿路轉一舸問津行野
水飛雲度斜陽去鳥明采蓮人不見遙聽唱歌聲

至通州

絕域經游少重關啟閉嚴官租蕪菽粟民業盡魚鹽海
氣朝成市潮聲夜入檐狼山渺何許空翠遠浮尖

冷泉亭口號與劉邦彥別

君去我獨留持杯勸君酒明日虎跑泉還來看山否

即景

綠樹原頭淺草青山谷口飛花記得南湖良夜月明曾
載琵琶

震澤竹枝詞送中書李舍人

二首

太湖東與海相通大浪掀天難使逢今夜且來洲裏宿
明朝又怕日高風

鴉鵲羣飛過別村烏雲接日晚昏昏西風一夜翻湖起
大小人家水到門

題靈隱祥禪師所寄扇

山月窺人色皎皎松風振瀑聲泠泠匡牀醉倚忽驚起
老僧時誦楞伽經

子昂蘭

國香零落佩纒空芳草青青合故宮誰道有人和淚寫

託根無地怨東風

朱近修云鄭所南畫蘭去土以宋亡土地非所有也讀西村作則趙王孫

蘭亦去土邪

趙同魯 四首

同魯字與哲長洲布衣有仙華集

王濟之云處士身居田里

而喜論當世事見人之屈抑與民間利害時政
闕失憤然若迫於身年饑三上書巡撫三原王
公得減稅銀近歲論東南水患起於常熟之白
茆港開白茆則水患衰堤崑山之沙湖則盜賊
息而處士已言於數十年之前矣方時舉云
先生宋宗室世家浦江仙華山下故以名其集
不忘本也集中作音響和平意度間遠無山林
之枯瘠無藜藿之窮愁而閔時憂國之意恒寓
焉及屢上當道書切切以東南賦重役餘為念
視民如饑溺若迫於其體膚有不能自存者方
之古人殆魯仲連之徒與陸子餘云先
生詩文伉健質實不肯骫骳以諧世好
詩話成引間布衣家居得言天下事如沈啟南
讀楊官詹守阯與屠尚書瀟論事劄子作為長
篇而曰江湖眇吾憂其言不可終屠答詩云願
言保遐壽待吾談始終未嘗以處士橫議藏怒

蓄怨焉與哲二上王三原書極言吳中財賦之重三原賞其文欲薦於朝事雖不果而兩公之虛懷可敬也自宋景定四年春三月買公田於浙西六郡共田三百五十餘萬頃所收者公租耳迨元有天下置江淮財賦都總管府又立江浙財賦府各領官田籍沒田皆不在州縣原額元史所記大臣賜田咸在平江等路於時官田已多及張士誠據吳所署平章太尉等官皆負販小人無不志在田宅一時買獻之田遍於浙西明初既入版圖按其租籍沒入之已而富民沈萬三等又以事被籍沒而浙西之官田愈多矣官田之租多者每畝輸倉米一石五斗少者七斗七升四合本依租以徵稅比租額而非糧額也相沿既久混租為糧於是官民之田科則相遠官田多者不勝其苦而蘇松嘉湖四府尤甚其後蘇州之田賦則巡撫都御史陳開均之

湖州之田賦則知府劉天和張鐸均之嘉興之
田賦則知府趙瀛均之稽諸實錄孝陵獻陵景
陵咸下減租之詔彼時尚分官民等則故然迨
平賦之後官田之重賦得輕在當日民非不以
為利然民田之輕賦反重在今日欲額恩求減
則其籍已去無從依據此司國計者所當留意
也至於嘉興原止三縣宣德中析嘉興添設秀
水嘉善析海鹽添設平湖析崇德添設桐鄉嘉
興民田多故田則輕嘉善官田多故田則重秀
水則官民相等故在輕重之間趙氏圖記可證
善邑不原其本爭訟者幾百年不知其
附郭二縣之弊猶賈似道之貽害爾

平賦詩 有序

國家賦役之重莫逾江南在江南諸郡又莫蘇

松若也而賦額尤苦於不均或膏腴而反輕或瘠薄而反重腴而輕者雖倍其入不過十稅其瘠而重者稍加其耗則稅其三之二矣其始蓋由國初以田賜功臣之家及豪強兼并者私重其租厥後犯法沒入則視其租以徵稅甚至陂湖沙漲咸在焉且輕者多入富家而重者則歸細弱是以富益富貧益貧吳民世受其患實由於此矧洪武間轉漕道近且海運不廢故耗

輕而民不甚病逮永樂中定都北方武臣憚道
之險疏裏河以通漕於是行資儻直咸出於民
始倍其耗故歲輸恒歎而逃亡相繼宣宗章皇
帝明燭是弊詔減官田三分之稅柄國者復寢
不行時蘇守況侯抗章上請得遵優旨又賴巡
撫尚書周公設水次倉以便輸納立對支易銀
諸法以省遠役故民頗蘇息而催徵易竣邇年
水旱薦臻疫癘時作餓莩接跡死亡相枕雖大

臣奉命屢加賑卹而瘡痍未瘳譬猶揚湯止沸而不撤其薪投膠理濁而不浚其源未見其可也乃去年秋御史中丞陳公奉勅巡撫京畿下車之始首布均則之令俾當出耗者賦額輕則倍之稍輕則半之而最重者則免焉參合分劑多寡適均貧者獲甦富者知其至公亦無不悅服田野阡陌間歡聲相屬不絕以為斯令也誠得聞之於朝著為定制則我公之德將與皇明

之運同垂於無窮矣若是而頌聲不作非在下

者之責歟同魯跽伏草野親沐膏澤有不容嘿者謹撰平賦詩一篇庸紀其實俾來者無忘焉

於赫皇明奄有萬方貢賦包篚罔不來王矧茲畿甸揚州之野厥土塗泥厥田下下因地制賦初匪不均末流敝刃輕重攸分或輕而腴或重而瘠富食其利貧罹其厄宣皇憫焉明詔是頒十宥其三民用乂安逮乎邇年歲稔癘作老弱累壘填溝委壑事既上聞屢下優詔亟

命大臣撫綏慰勞賑之雖至民則未甦繼命我公我公
曰吁盍澄其源盍正其本不釐爾賦曷救爾窘輕重參
停各盡其情如鑑之公如衡之平若解倒懸若拯焚溺
謳歌鼓舞道路充斥譬彼雪壑釋然春融誰其致之實
惟我公何以報之願公受祉毋久賢勞歸相天子天子
元首我公股肱一德交孚福我蒼生野人作頌敢告太
史祝我皇朝億千萬祀

感遇 三首

吾慕魯連子飄飄遺世氛英風振八極高懷薄層雲寧
甘蹈東海肯仕非其君若人儼猶在百世疇能羣

君子重名教小人偉竒功嗟哉樂羊子食子思徇忠沛
公誠何心忍令烹若翁父子恩既薄君臣奚始終

歲華既云晏心事成蹉跎窮達固有命卷舒如我何抗
志磻溪釣紆情莘野禾鴻飛日冥冥不復憂虞羅

姚丞二首

丞字存道號畸艇長洲人弘治中貢生有集虛

齋橐

詩話存道為文毅公希孟高祖吳尚書一鵬婦
翁也友于楊君謙王濟之與沈啟南酬和尤數
吟詠之暇不廢詆諧鄉人周宗道者修髯而皋
橋趙鳴玉無鬚存道請於周分十鬣予趙啟南
為草募疏云伏以念天閭之有刺憫地角之不
毛雖傳相莫逃於禿名賴易貢尚存乎飭義為
人者康樂捨施有迹為己者崔謔插種有方故
小子十莖之敢分豈先生一毛之不拔推其餘
以補也宗道廣及物之心乞諸隣而與之存道
獲成人之美使離離綠坡而詫我當楫楫擊地
以拜君把鏡生歡頓覺風標之異臨流照影便
堪相貌之全未容輕拂於流羹豈敢易燃於覓
句感矣荷矣珍之重之一時傳以為笑斯亦風
人善詭之遺也存道詩未發雕流傳遂寡孝廉

田修出家藏本
錄其近體二首

題畫

白鴈啼荒渚蒼涼露未收
潮聲驚野客曙色動孤舟
霜葉如花好溪雲似水流
無端鄉思切一上海邊樓

過宋故宫次沈啟南韻

廢苑秋深草樹微
湖山湖水少光輝
不應河北頌師急
却使江南報捷稀
行殿聲沉環珮玉
寢宮香冷綺羅衣
空教過客增惆悵
搔首無言對落暉

崔 澂 三首

澂字淵甫吳江人國子監生有傳響集

楊君謙云淵甫

既升太學即絕意仕進一工於詩不啻飢渴之於飲食也七何而白玉樓名命至矣惋歎如何

老禪焚香啜茗悠然有餘味 蔡九遠云先生

詩步盛唐格律氣味絕相似 顧行之云傳響

集詩溫亮雅緻琅琅若振玉可以竝古作者

詩話淵甫年未三十而天當其存日楊君謙吳

原博李貞伯都元敬沈啟南周伯器史明古諸

君子皆與訂忘年之交原博尤重之呼為崔小先生云集中和唐詩多至三百七十餘首恪守

唐人矩矱而未成變化使假之年當不止是此諸君重為悼惜也

春江送別

頭白猶為客辭家是幾年
離筵臨野水歸路入江烟
鳥度青山外帆開暮雨前
春波與春草悵望一淒然

渡口

落日滄波闊西風木葉稀
沙頭人語雜烟際櫓聲微
燈火誰家起漁樵幾處歸
臨歧笑揚子何事淚霑衣

偶題

行舟小住更聽歌江上東風吹綠波
折取桃華贈離別

却憐春色已無多

程慶珣 一首

慶珣字廷殷休寧人

王仲房云廷殷早游吳門與吳原博沈啟南楊君謙

黃勉之友善晚集國朝詩二百餘家止於弘治雖搜密東南采遺西北亦可留資後評有功藝苑矣

八孩口

沙明水碧淨無泥三百灘盤上歛溪兩岸青山春欲暮
棟花飛盡竹雞啼

史忠一首

忠字端本一字廷直上元人

周吉父云癡翁詩寫自己胸次不以

鍛鍊為工盛仲交合金元王之詩編為江南二隱橐

詩話廷直自號癡翁近治城建樓題曰卧癡楊君謙為作記翁畫山水人物花木竹石皆工嘗

訪沈啟南於吳門不值見堂中櫥有素絹搨筆作山水不題姓名而去啟南歸見之曰吳中無

此人必金陵史癡也邀之回留三月乃返翁妻樂清道人朱妾白雲道人何玉仙玉仙亦善畫

工篆書知音律翁教以琵琶每自製曲命玉仙被之絃索晚無嗣一女既笄貧不能娶與婿

期元夜略具隻雞斗酒我當過飲至元夜誑其妻女曰家家走橋觀燈盃亦隨俗可乎攜妻與

女送至婿家留其女一笑而別即是而觀翁正
未嘗疑也二隱素流傳絕少題畫一絕乃仿小
米雲山書法頗豪縱曾
觀於休寧吳璵于庭宅

題畫

雲光辣闌樹模糊略約芭籬路有無曾對南徐江上雨
會心只有米於菟

倪復一首

復字汝新鄞縣人有畏齋橐

江行

野水田田綠江村曲曲斜獨行尋不厭坐占白鷗沙

雷鯉一首

鯉號半窗建安人

汪良迪云半窗詩冲雅清婉曲盡物情

題畫

怪石窗前墮流雲竹外斜
薜門斜照裏一徑入黃花

張鈇二首

鈇字子威慈谿人有碧溪集

淮陽夜月

今夜淮陽月清光似故鄉有人千里外對月望淮陽

湖上竹枝詞

門前湖水白茫茫望盡烟波不見郎彷彿聞郎歌水調
鴛鴦飛起藕花塘

黃雲 十一首

雲字應龍崑山人由歲貢生任瑞州府學訓導

有丹巖集

朱士光云先生長篇短詠馳騁古今其氣溫然而粹其旨穆然而遠

詩話丹巖懷才不遇嘗渡清淮盡以文橐投諸水晚就一羶苜蓿之盤不飽賦闕食詩云妻子

恒苦飢生事轉疎拙矧茲秋收時吾室甌儲闕
名微賤賣文所得亦易竭又絕糧詩云今朝斷
晨炊家人盡僵卧天陰動寒氣鳴屋霰交墮入
市糴脫粟薄廉聊極餓可謂窮矣詩雖未純然
勝林屋
十倍

游焦山

昔年過焦門風帆徑飛度老矣遂此遊清絕快平素僧
堂列古鼎款識成周鑄秀疊水墨屏晴披濃綠樹石壁
舊題名苔蝕若簡蠹仰止三詔洞而以焦君故瘞鶴下
勒銘水落偶一露大江亭呼吸高雲岫吞吐絕頂御冷

風千里可指顧縱目窮扶桑出日蒙海霧俯仰歎今昔
往來走烏兔大哉神禹功明德詎能賦

重脩瑞州學石隄工人沒水得古石鯨

穎宮臨清江下瞰百餘尺水激岸善崩雷闕走羣石不
知古石鯨何年此窟宅掀置水之溢其勢欲跳擲依然
鱗甲動水苔滋冷碧得非昆池來遂與牛女隔中宵寂
無音桐魚庶可擊

鄱陽阻風

歲暮多北風無那歸舟逆一檝茅葦洲濤聲駭滿澗
深螫蛟龍雪舞浪花白船聚即有鄰細語向旅夕賴作
寇盜防憂虞亦稍釋垂暮嘗險難嗟我為貧迫古有高
世流寧為此行役

白溝次東之韻

西山鬱高寒青繞燕代閣我行春已深絮纒尚未脫平
生四方志眼底纔圭撮區區白溝河編簡不能剗經涑
流漸廣赴海傾莫遏欲渡仍徘徊緬懷開運末茲維遼

晉疆終古抱嗟咄天公憤餘腥飛雨夜來潑堂堂十六
州幅員一朝割桑君漫周旋國旱爾為魍中原殺戮盡
豈忍狼犬括哀哉黃龍府回首飯無盃橫流到靖康戎
馬屢南跋往事勿具陳憂端猝難豁居人諱言兵惟記
黏與曷

烟江疊嶂圖為陳推官賦

趙家駙馬王晉卿畫筆直與造化爭寶繪堂開品神妙
烟江疊嶂新圖成東坡老人發天趣樹搖江色春空晴

武昌樊口五年住楚澤放臣同濯纓後來烏臺入詩案

嬌紅泣露啼春鶯

自注嘯春鶯晉卿家姬晉卿與東坡同謫姬流落人間

兩翁富

貴春夢破寓意奚啻鴻毛輕後來吳興王孫規模亦神
似終遜舊本尤精英陳侯出佐山水郡桁楊畫卧莓苔
生挂之高齋一丈壁仿佛坐聽秋泉聲陳侯陳侯慎勿
卷還積或恐飛去難為情

寄沈石田求畫

五日十日畫水石經旬亦可成一幅我求君畫故作難

三四年過將五六人來莫怪數附書譬諸熊掌吾所欲
擬乘艇子促迫之又恐收書到城隍題詩再拜致執事
煩君開緘一寓目忽焉為我發新興湖上草堂風滿竹
三茅二華入手筆崢嶸之頂空洞腹經營意匠忽貌成
爛逸天真洗凡俗厚予之嗜亦多矣豈止三月不知肉
若令烏有先生來只向江山寄遐矚

施彥清野翁莊次沈啟南先生韻

笑王給事鎖西莊隔水通人故架梁載酒柴門無吠犬

分花鄰舍恰低牆書臨晉帖時數過詩詠幽風日幾章
好鱸魚飯香稻縱饒飛雪興難妨

風雨

風雨暗江天邊江夜泊船寒燈對兒女歸路逼殘年

題畫

曾躡匡廬五老峰連山雲氣擁長松而今看畫渾相似
夢斷開先寺裏鐘

雨止

滯雨無聊待雨晴依然飽飯聽松聲西風短檝明朝發
一路看山直到城

蕭齋

三月琴川四月還虞山佳處儘躋攀曾於拂水巖頭望
一塔煙中認玉山

莫止四首

止字如山無錫人有南沙集

俞汝成云南沙與邵文莊相友善故

其詩格律音韻亦相似周青士云南沙亦有佳句如云天閣一聲何處雁江平千里獨歸舟

新添十竹皆紫玉恰對九峰如畫屏松塢風
高聞落子菊籬秋晚愛餘花皆倚然拔俗也

鴨城懷古

養鴨鴨可馴養兵兵可彊只有方寸心多慾難自防千
年古城已復隍但見牧豎驅牛羊姑蘇之臺近相望二
十三君在何許開吳祖德誰繼將玩人玩物皆喪亡喪
亡豈獨由禽荒嗚呼古今即事感慨長酒酣日落天蒼
茫

正月十九日漫述

節名燕九尚留燈故事元從闕下增時態盡隨前夜月
餘光猶照幾家棚臘醅熟久樽初剖園韭香新饌可登
細雨落梅清詠徹高情應念昔人曾

昭君曲

但使邊塵靜蛾眉敢愛身千年青冢在猶是漢宮春

成化乙未仲冬書事

病眼經旬只掩書蕭蕭梧竹自村墟忽然驚喜開門出
天子今朝已建儲

周紹亞一首

紹亞吉水人成化初內黃訓導

朱仙鎮岳王祠

南渡擎天一柱摧塵沙滿眼實堪哀
金戈北伐心何壯鐵馬南還志已灰
鴈字傳哀天外去河聲流恨月中來
我今謁廟瞻遺像痛挹椒漿奠一杯

鄭延三首

延字世昌海鹽人成化中以貢授廣東市舶提

舉有東谷存笥集

雨中次彥超韻

對雨愁無那時扁白板扉驚看塵鬢改坐使壯心違有
客傳棹素何人問布衣思君不得見心逐白雲飛

懷劉隱君

隱君家住秦溪上茅屋蕭然掩薜蘿記得春風曾有約
扁舟載酒一經過

題畫梅

羅浮山頭孤月明
碧天澹澹參星橫
玉人歌舞萬籟歇
樹杪翠羽飛有聲

陸 董 一首

董燕人

贈別秉智

沈啟
南甥

已富三冬學青衫
稱少年遠尋東老寓
獨羨外甥賢雪
變寒江雨鐘鳴野寺天
又驅羸馬去離思遶長川

羅 燾 三首

燾字元溥上元人由歲貢生授光澤主簿有淵
泉集

宿黃龍觀

杖藜迢遞尋仙源古祠遙見雲中藩空林山猿食栗響
深澤野獺銜魚喧道人步出懸崖下度竹穿松遠相訝
焚香邀入紫芝居為寫黃庭坐清夜

野興

山中雨欲來樹杪風先起猶有試茶人偶坐松蘿裏

贈愛山上人

古寺高僧意自閒
虛堂新構翠微間
白雲綠樹遙相映
愛看當窗雨後山

錢百川三首

百川字東之無錫人有寒齋狂豪

俞汝成云東之少年學琵琶

琵琶半日度四十曲人以為神解
詞賦多不傳晚宗陳白沙氏

詩話東之絕句小詩頗類崔國輔晚師陳莊遂
為學究體其觀石田集詩云宋周程張朱道大
言莫比迄今五百年惟陳白沙氏未免頽然自
放矣句如持竿坐惜籬邊水仰面貪看屋上山

淺碧杯中歌落日亂紅堆
裏宿殘霞想猶少年作也

江南曲 三首

采蓮復采蓮采采不捐手貪摘雙頭花拔斷連理藕
湖南采蓮花湖北采蓮葉回頭見郎來低頭理雙楫
小姑未成人不慣見郎君蕩舟入新荷牽壞紫羅袿

乞食

陌上桑重綠門前麥已黃逢人話豐稔乞食尚無方

寄中甫上舍

淮清樓畔花白下橋邊酒醉殺少年兒借問君知否

葉聰四首

聰字文明永嘉人以子式貴贈翰林編修有九
斗山人集

呂梁洪

西風將客櫂飛度呂梁洪地迴雲垂野天低雪滿篷山
從豐沛下水向泗淮通疏鑿誠非易懷哉大禹功

秋懷

北斗城高近海濶每懷風景動微吟青山有恨傷甌越
流水無情自古今幾處吹笳空夜月誰家擣練急寒砧
天涯此日重回首忽見江花思不禁

舟次瓜州

瓜步南頭水拍天高樓獨望思悠然半江僧下山腰寺
兩岸人分渡口船萬斛千艘非舊日一龍五馬是何年
邇來欲趁風濤便十幅蒲帆向浙川

舟中新涼有感

畫舸西風日夜清
新涼已覺葛衣輕
去家千里又千里
望闕一程還一程
露浥芙蓉宜曉色
月明蟋蟀盡秋聲
積思宋玉悲何限
可是忘歸愛遠行

張承一首

承安陽人山東教官

詩話張君為崔後渠門人客至一詩意甚蕭遠

客至

茅屋兩三間
草草蔽風雨
客來不入門
坐愛千年樹

陳蒙一首

蒙字允德常熟人有汎雪集

宿遷

古邑臨河水昏鴉噪縣門連檣爭集市三戶自成村禾黍秋風隴牛羊落日原客愁千萬種辛苦向誰論

戴冠一首

冠字章甫長洲人以貢授紹興府學訓導有濯

纓子集

題姚少師畫竹即次其韻

北地風高卷塞雲，驚沙吹起鴈成羣。
客邊偶寫龍孫譜，

忘却江南有此君。

王湛求云風人善戲之遺

方太古四首

太古字元素蘭谿人有寒溪子集

詩話布衣初受經於楓山，中年棄去專力於詩。
不苟隨時尚，句如老松萬樹，雲深雪流水一溪。
浮落花白布探囊，無長物烏皮，凭几笑貧居。
平田白洳流，新雨絕塵青楓挂，斷雲朝看烟雲如。
晝裏夜聞風雨似潮生，多情夜雨馬蘭草無限。
春風鷺粟花雲洞，草香初過雨月臺，松老不知。

年頗近江西詩派
蓋特立之士也

山中

山中歲云暮抱膝惟長吟
北風吹蓬藿悲響懸高林
仰視浮雲翔白日不為陰
昔我三春花今日不可簪
昔我洛浦錦今日不可衾
孤鴻逐黃鵠石上鳴瑤琴
瑤琴絃朱絲一操論千金
真音不諧俗聊以明吾心

寒食思友小酌

已買桐江舊釣船
清江白石趁鷗眠
風前轉眼逢寒食

時事驚心豈少年故國梨花千樹雪小堂楊柳一林烟
夜來有夢高陽侶覓得村沽飲十千

書寒溪書屋壁

屋占桑麻半畝園歲無車馬與人喧午涼樹影圓浮地
夜靜灘聲直到門萬卷詩書銷日月一灣鷗鷺共朝昏
興來蓑笠扁舟去不亞浣花溪上村

穀雨

春事闌珊酒病瘳山家穀雨早茶收花前細細風雙蝶

林外時時雨一鳩碧海丹丘無鶴駕綠蓑青笠有漁舟
塵埃漫笑浮生夢峴首於今試薄遊

程玄輔一首

玄輔字叔朋歙人有龍谷老人集

雪後次吳江

北風吹短日孤櫂倚松陵城郭留殘雪江流走斷冰
新詩歌自慰好夢笑無憑故舊吳山下山陰興欲乘

金琮一首

琮字元玉上元人自號赤松山農

送別史癡翁分得塵字

酌酒題詩送故人
卧癡樓上宴殘春
誰能老去身無事
我媿年來鬢似銀
楊柳風輕渾是夢
杏花雨細欲成塵
行裝賸有金壺墨
處處湖山為寫真

吳 鑛 一首

鑛字希聲歙人有月溪集

秋晚

風高野水寒天遠青山小渡口人不來斜陽送歸鳥

陳達

甫云絕
似右丞

沈本初二首

本初字大中崑山人有婁曲山人集

周子籲云
大中詩沖

澹和平老
而彌篤

嘯臺晚眺

高臺凌日暮幽懷一何閒凭闌縱遐眺員嶠如可攀雙
鳧下澄沼一鳥鳴花間欣欣物意榮寧知光景遷倚劔

白雲中賦詩蒼厓巔飄然拂衣起采菊歌南山

送周山人南

東風晴日送餘寒野色山光恣客看立馬春亭勸君酒
醉君容易別君難

朱曜一首

曜字叔暘松江華亭人以鄉貢仕為鹽課提舉
後以子豹貴封御史有玉洲集

唐仲言云先生詩肆筆沛然若

不經意然有味外之味他人旬鍛月鍊或不及也錢武子云封君詩取自娛不事敷琢然如

翠竹呼鳩婦青畬長稻
孫不可謂非佳句也

喜雨

一犁春雨潤新田
小犢還宮老犉眠
笑摘園蔬漉村釀
夜燈兒女說豐年

秦 顛 二首

顛字仲孚無錫人夔之弟有滌煩亭橐

趙元默云昔人

評詩謂有詩中畫有畫中詩集中如杖藜扶我
溪橋步看盡湖南十里山則詩中畫也微風輕
颺茶烟起知有人家
在水西則畫中詩也

詩話仲孚為修敬封公季子封公暴中心痛仲
孚刺血於胸和酒飲之母殷恭人膝傷吮之而
愈郡縣上其事詔旌其門曰孝子秦陵即昨賜
以冠帶嘗作溪山清興堂清遠閣結亭於後圃
顏曰滌煩九日詩云抱病忽聞佳節至獨攜藜
杖強登臨黃花笑我容還瘦綠酒盈樽手自斟
處處辭巢知社燕家家悲杵送秋音不堪覽鏡
頭如雪折得好枝嬾去簪次日得疾不起其詩
較父兄別裁體格
頗有清疎之氣

溪橋散步

老去觀書興易闌綠陰清晝况多閑杖藜扶我溪橋步

看盡湖南十里山

龔行儉以扇索畫

行過溪橋日欲低
綠陰滿地郭公啼
微風輕颺茶烟起
知有人家住水西

周立一首

立字公禮長洲人

將過江陰訪朱善繼塗中風雨乃回

尋君無那朔風顛
興盡空回訪戴船
洶湧浪喧欹岸石
冥濛雨濕遠林烟
江楓葉落紅銷樹
野水冰生白滿田

歲晚幽期嗟竟阻相過重擬入新年

董灑 四首

灑字復宗海鹽人有從吾道人詩藁

詩話蘿石聞陽明講學瓢笠渡江從之時年六十有八年長於陽明云明年從其師越中守歲風雪夜賦詩所云六十九年今夜除者是也陽明和韻云况有故人千里至不知今夜一年除復為序其事云道人今年已七十往來湖山之間去住蕭然曾不知有家室其子穀賢而孝謂道人老矣出輒長跪請留道人笑曰爾之愛我也以姑息吾方友天下善士以與古聖賢為徒天地且逆旅奚必一畝之宮而後為吾舍邪集有山居吟云青山遶湖茅結廬飢餐渴飲事無

餘是非欲付樵與
漁洵達者之言也

天竺次白樂天

松林行盡見松門
花事三分過二分
高樹鳥呼低樹鳥
入山雲笑出山雲
峰前瀑布僧前落
竹裏流鶯寺裏聞
忙處不知閒處好
紅塵白浪正紛紛

次沈紫峽病起

白贖坊中矮沈家
小山池館足烟霞
春回病骨三年艾
門掩青湖獨樹花
詩草也堪書酒券
釣竿長是拂田車

客來更覺山翁健一笑窺園出絳紗

醉漁

石佛寺前江繞門柳姑祠下花連村何人得似漁郎醉
白日青天枕瓦盆

月夜舟行

野鷗抱夢棲煙渚山月隨舟過水村猶有打魚人未睡
共聽更鼓到城門

薛章憲一首

章憲字堯卿江陰人有浮休居士集

趵突泉

感涕趵突泉發源自王屋湫流溢為滎迤邐陶丘北黃
山渴馬厓入地乃更伏潛行五十里突爾出平陸曾不
舍晝夜東匯成川澳乍似滄浪水浴出三白鵠更疑清
泠淵白龍服魚服蒲荷相蔽虧鳧藻舞濡淥踟躕不忍
去奈此白日速

魏偁 二首

偁字達卿鄞縣人官石城訓導有雲松詩略

李杲

堂云雲松詩略歐陽鵬所選於三千餘
首中止錄三百四首所遺必多佳者

題歸隱圖

若有人兮遐方薜荔衣兮荷裳餐三芝兮五藥寒幽獨
兮茅堂春日兮遲遲春風兮微微鳴鳥兮喈喈垂楊兮
依依覽佳辰兮何求沛我行兮蘭舟時不可以苟得邈
予懷兮中洲雲冥冥兮欲雨投芳菲兮歸處羌蹇修兮
未來聊舒遲兮容與

十八灘歌

水中亂石立森森急溜盤迴一派深山鳥任呼行不得
舟行自古到如今

史 徐一首

徐字巽伯溧陽人都指揮有樂山集

宮詞

玉樹花枝過雨稀不堪減却小腰圍朝來陡覺香羅薄
還著團金舊賜衣

朱 訥 一首

訥字存仁寶應人成化丁酉舉于鄉選知郅縣
調長陽以子應登貴封郎中

題畫

空翠明遠林夕陽澹紅樹茅屋傍深溪漁舟日來去

楊 中 一首

中字致行無錫人有簡齋集

題畫

素衣緇盡鬢絲蓬兩脚東華踏軟紅何似儂家江水闊
醉眠春雨釣船中

胡尚志 一首

尚志字士先績溪人有海陽集

雜詠

秦越隔千里坦坦皆夷塗苟羸旬日糧真可造其區彼
昏自狂悖舍夷繇徑趨野徑多岢嶲况復迷方隅窮年
不能達力倦空踟躕徒使旁觀人咄咄長嗟吁

朱 朴 十五首

朴字元素海鹽布衣有西村集

苦哉行

年荒莫蠲糧蠲糧民益荒歲歉莫賑濟賑濟民益傷虛
名及小戶米入官家倉僅為公門需那得充飢腸苦哉
復苦哉淫雨天降殃但聞流水聲不見白日光菜甲短
棲畝麥苗已委黃濕薪及爛醯其價十倍強二月春已
半桃李無豔陽出門泥淖深况復多虎狼苦哉難重陳

淚下霑衣裳

山中懷遠人

空山闐寂兮無人麋鹿狝兮成羣風瑟瑟兮自起泉
滴滴兮相聞晨光發兮出日夕色暝兮歸雲獨怡悵兮
登陟眇予懷兮思君

秋夜吟

風披披露淒淒草蟲互相語林鳥無定棲人來不來關
塞隔月出未出天河低誰家屋頭烏夜啼

寒食行

寒食清明天氣晴家家上墳齊出城
小家叢冢不栽樹雖有紙錢無挂處
大家新墳松柏多羅城石柱高嵯峩
兒孫跪拜女婦笑杜鵑啼血黃鸝歌
誰家古墳生荒草滿地落花人不掃
當時從莖極繁華碑碣猶書鳳鸞誥
鑿地聚土作玄宮術人指點來三公
三公不來術人去只有石獸嘶秋風
子孫流落無可奈翻道此墳風水害
又疑棺槨有金銀掘作平田向人賣
嗚呼世間萬事空

紛紜貴賤變化皆浮雲生前但有一杯酒身後何須三
尺墳

細腰蜂為羣兒所傷有感而作

螺贏螺贏草下青蟲銜一箇飛去飛來遶戶庭嗚嗚有
聲祝類我孩兒害物何不仁驅逐頓令巢穴破當時遠
計為兒孫遠計無憑近成禍因之令人三歎息黃蜂采
花勞羽翼辛苦功成不得食割作它人口中蜜春風三
月桃李時不如就使花狼籍

靈隱寺

合澗橋頭水飛來洞口山鳥盤蒼壁影僧掩翠微關松
露晝還滴巖花秋更斑一年嘗一到一到一忘還

吳江道中

江上芙蓉晚著花故人書畫汎輕槎廿年往事今重省
雙鬢逢秋各有華水落湖田漁網集天低澤國鴈行斜
垂虹橋下堪停櫂碧樹紅簾賣酒家

楚江秋曉

卧聞津吏數江程
白鳥青莎岸岸明
秋色遠連湓浦樹
人家多繞漢陽城
殘燈野寺鐘初動
瘦馬河橋客早行
三國廢興何處問
荻花風起又潮生

贈張惟愛秀才

有美人兮山之陰
我欲放舟何處尋
幾時射策蓬萊殿
猶自讀書松桂林
神交千里夢已接
詩社百年情獨深
芙蓉可折不可寄
江水浩浩傷人心

以畫寄雲村

朝望南山雲暮望南山雲雲山朝暮望一望一思君

董兩湖扇圖

南湖春水平北湖春草綠中有蕩舟人解唱滄浪曲

夕

出門望南山日夕山光冷山月出未高樓鴉動林影

西湖竹枝詞

二首

阿儂家住湖水傍菰米萼絲野飯香貓頭紫笋尺圍大
沙角紅菱三寸長

郎從湖上打魚鰕
妾在湖邊只浣紗
生長不離湖水上
湧金門外是儂家

題水仙花

碧池妝鏡曉寒消
不染鉛華意自嬌
惱殺江南趙公子
却將金粉浣生綃

謝復一首

復字一陽歙人
布衣有西山橐

春日偶成

二月春光好村村景物賒綠垂烟外柳紅綻雨中花倚
杖登危嶠提壺坐淺沙耦耕今有伴隨處可為家

袁仁二首

仁字良貴吳縣人有一螺集

漫興

不干榮祿息危機茅屋三間老布衣多少長安騎馬客
故鄉深院鎖重扉

暮春有懷

花老辛夷萬綠肥
草香江岸燕低飛
故人竟負看春約
回首東風事已非

明詩綜卷三十

總校官庶吉士臣張能照
校對官檢討臣龔大萬

謄錄監生臣賈捷三

欽定四庫全書薈要

集部

明詩綜卷三十一

詳校官編修臣王天祿



欽定四庫全書薈要卷二萬五百四 集部

明詩綜卷三十一

翰林院檢討朱彝尊編

福一首

福字與謙松江華亭人弘治庚戌賜進士第一

官翰林修撰有鶴灘集

靜志居詩話鶴灘吟情以捷敏勝故自解春雨
後凡俚詞儷句動輒歸之此選家皆棄不錄也
喬希大志其墓曰與謙卒年纔四十有四予與
與謙同游邃菴西涯二先生之門與謙嘗言作



大須昌其氣先使一篇機軸定於胸中然後下
筆當沛然莫禦矣又言辭必根據道理雖恒言
近事亦不可略然則鶴灘亦不專以捷敏
勝人所傳俚詞儷句亦未必皆出其手也

少年行

荻芽新長河豚肥吳姬作羹俊味稀金陵子弟快一飽
挾彈走馬穿花歸

靳貴一首

貴字充道丹塗人弘治庚戌賜進士第三累官
太子太保戶部尚書兼武英殿大學士贈太傅

謚文僖有戒菴集

詩話文僖康陵舊學南巡時臨其喪命詞臣撰祭文皆不稱旨御製一首云朕居東宮先生為傳朕登大寶先生為輔朕今南游先生已矣嗚呼哀哉代言者歎息斂手晉江何氏輯明文徵以此壓卷焉

碧渠為李宗朝賦

白雲深處有山莊分得清渠入小塘水面雨翻菱葉亂
門前風過稻花香竹林不作勞生夢石硯惟鈔種樹方
樵子是兄漁是弟卜鄰何計得連牆

周澤 一首

澤字天雨嘉善人弘治庚戌進士官贛州同知
梅花道人墓

古墓牆陰卧斷碑白楊高樹叫寒鷗閒雲終日自來去
不見梅花老畫師

方良節 一首

良節字介卿莆田人弘治庚戌進士官至布政
使有雪筠集

題李在畫

烟霏壓翠萬峰低
樹樹陰濃路轉迷
何處人家春不管
落花流出小橋西

楊旦一首

旦字晉叔建安人弘治庚戌進士授吏部主事
累官南京吏部尚書有惜陰小亭

小圃即事

池館圍春曲徑通
虛檐掩映綠陰中
入門頓覺風光別

幾樹桃花隔竹紅

祝允明六首

允明字希哲長洲人弘治壬子舉人除興寧知縣遷應天府通判有祝氏集略又有金縷醉紅

窺簾暢哉擲果拂絃王期等集

顧華玉云希哲玩世自放憚近

禮法之儒學務師古吐辭命意迴絕俗界效齊梁月露之體高者凌徐庾下亦不失皮陸

子餘云先生貫綜羣籍稗官雜家幽遐蒐璣之言皆入記覽發為詩文橫從開闔茹含古今無

所不有王元美云祝希哲如盲賈人張肆頗有珍玩位置總雜不堪

詩話六如居士畫枝指生書允稱絕品至於詩
遜昌穀三十籌然如莫食汨羅魚腸中有靈均
小山侵竹尾細水護松根麥響家家碓茶提處
處篁入家低似岸湖水遠於天置之歎歎集中

正自

難辨

和陶飲酒 二首

大道本一致無間寂與喧每有希尼時不見耳目偏逝
水喜東流浮雲忘故山美人隔秋風涉江恥空還旦暮
或遇之莊周有遺言

吾足如轉蓬遇風無停時節候迭代序嘗與家室辭三

歲凡五出別離復在茲行止豈有津誰為我稽疑不若
巢中禽乃免霜霰欺天運實為爾通塞任所之

愍農

大麥青青四尺長大水過頭一尺強安得不託與餒餒
無饑餒且自可秧不成苦殺我

漢關

漢關咸陽建山河百二開甘泉芝草出天馬大宛來宣
室宵衣問長楊獻賦回寧知天祿閣不用子雲才

廣州贈龍鴻臚

吉水龍夫子論交歲月長
屢銜天子詔三使日南王
欲餽舟無寶留題橐有囊
一杯海濱館遠意共茫茫

題畫

柳風吹水細生鱗
山色浮空澹抹銀
總道江南風景好
從前都讓畧泥人

何孟春 二首

孟春字子元郴州人
弘治癸丑進士除兵部主

事歷郎中出補河南參政入為太僕卿以僉都
御史巡撫雲南名為吏部右侍郎以議大禮泣
諫左遷南工部右侍郎尋削籍卒謚文簡有燕
泉先生集

送王伯安南都審刑

秋雨彌天來秋風動地發秋官方用權暑氣歸七月四
壯復何之時當奉天罰黃紙下青冥欽哉惟帝曰罪毋
脫秦黥法勿加楚刑三覆五覆間務使事情核宸衷一

寸丹載拜書之笏年來民俗漓肯長其告許年來吏事
冗肯聽其唐突持此直如絃何人行請謁持此平如衡
何人得乾沒莫將五德鳳擬以獨擊鵠筆端有造化還
解肉冤骨山川幾經歷歲月去飄忽簿書盈几席肯作
塵勞咄夜分燈火孤清興諒難汨檢點紀行篇浮蹤遍
吳越歸朝擬何時欲及衆芳歇民物哀矜餘轉覺心如
齧好為萬言書伏奏蒼龍闕

洮岷道中

景色來西徼蕭條信遠方水分羌部落山絕漢封疆幾
處青稞熟深憂白雨傷荒城誰為守十室九逋亡

顧清 十八首

清字士廉松江華亭人弘治癸丑進士改庶吉
士授編修進侍讀忤劉瑾調南京車駕員外郎
瑾誅還侍讀進少詹事引歸為南禮部侍郎進
本部尚書致仕謚文僖有東江集

孫貞父云文
僖吟詠篇章

有關民
情世用

七月十六日鄉人會餞兩新令于寓舍書所感成

三十四韻

吾邦古壯縣馳望自宋唐勝國登使府因之啟上洋官

曹雖日崇阡陌仍故疆宋季已窮蹙取民猶甚涼

報省稅十

一萬貫實徵八萬納止三萬餘

一壞賈綿州再困朱管張

賈買公田加賦後籍沒朱

國珍管明朱清張瑄名田按租起稅

浸淫到國初乃至十倍強

兩稅共一百四十萬

浮名累仁政有識空歎傷宣祖痛裁損經綸更文襄民力既已紓賦入乃有常公家無闕事帑廩有餘藏後來

諸君子率由如舊章至今鄉父老稽首周侍郎

周文襄以侍郎

巡撫後升尚書而民止呼其故官

粵從近歲來智者好紛更或云時世

異古法令難行或云廣儲積典守為民殃墉坊一以決

狐鼠恣披攘但見私稅增不聞公廩穰已已及庚午諸

倉惟棟梁苟能實蠲稅猶或幸小康功名掩慈惠白紙

裁青桑都將烟水區指作禾黍場一字挂經費年年理

逋亡從此遂困弊蕭然類窮鄉去夏復霖雨湖田盡滄

浪監司不肯奏郡邑徒蒼皇荒租二十萬積雪傳嚴霜

君子清廟器牛刀試新芒顧此凋瘵餘宜爾勞運量立
國自有本為政自有綱不聞慈母子饑寒啼路傍往迹
既非遠後賢慰相望區區閔人窮寢食熱中腸願見德
化成聯飛入明光還將鏤青管濃筆書循良

送宗都運之長蘆

我家東海居目擊齶丁苦民勞莫如農衣食自王土輸
官贏斗升大小得濡煦溟沙烈萬竈勺合盡官府燎薪
與募直一一挂文簿商課或不充輸錢為市補緡非

天墜貿易復何所不應為法初乃爾自相悟公私兩煎
迫稱貸日旁午窮年困炎歎肉盡繼肝膂坐令兼并徒
旦暮收拾伍微文牽積弊魚爛不可舉常思桑孔意寧
料遽如許必逢忠愛士重為整機杼宗君滄州行倚任
切當宁北南雖殊風物久理同蠱執炎思冷風止亢覲
霖雨予言未可窮君行念靡盬

程德望祠部登月亭

方塘開我前明月出我東仙人騎鶴來憩我亭之中調

笑弄月影徘徊吟天風夜久月漸高光滿池若空遺我
丹桂枝自攜白芙蓉飄然凌風去千里懷德容

飲酒

故人飲我酒坐我清湖潯中燕游後園俛首交綠陰側
磴度別渚回堂面長林西日明遠陂流光蕩我襟喟然
懷往昔茲地幾登臨亭臺無遺構風水有餘音想當古
人時豈不亦似今運去鳴鳥寂時來蛩蠋吟無為後者
惜綠醕方在斟

記蝎 并序

蟲之毒者南方之即且北方之蝎即且能飛見人輒疾走而蝎行甚緩聞人聲反止不動故多為人得七月廿三夜聞牕間爬沙聲火燭之踞而翹尾卓然可畏乃知其不動者蓋將以有為也而蝎止以伺之其甚矣然卒以自斃悲夫

讀書心二三耳聞牕蝎走卷紙濡餘膏火起蝎在牕抑首伏不行翹尾若有候人言蝎易得此意殊未究懷毒

乃忘身禍起遂莫救
柳州憐蝮蛇釋械低子首
因詩戒宵人陰賊恒反受

張節婦詩

節婦京師人錦衣衛指揮僉事讓之女許字華亭張少保蓋子昱卒女誓死

不嫁

妾面君未識妾心君豈知
君死妾獨存誰當知妾悲
父母生我時願我有所歸
生死向君家終我百歲期
我非慕共姜我非師伯姬
自憐有此心不忍分兩岐
皇天閔婢弱回光照孤闈
大字表貞節黃金鑄門楣
我女諒非

婦拜命慙恩私翻思摧裂初一死真如飴餘生已多枯
寧復知此為賢者有備責妾人無悔辭永抱一寸丹千
秋從是非

放船作

時初中
鄉舉

潛魚不出椽栖鳥不出林不因風雷便豈識天地之大
江湖深天風颭颭吹黃槐江船擊鼓凌晨開雲帆悠悠
渡三泖使我塵襟豁如埽將軍祠前芳草多陰廊古瓦
封苔窠英雄恨殺白衣櫓千載此地還來過陳湖北行

勢尤大氣象渾疑在天外波光黯慘迷西東我疑此處
藏蛟龍同舟之人半失色驚雷歎雪吹腥風出門咫尺
已如此况乃天涯千萬里

壬申正月十九日過北野同南村訪北花園廢址
明日北野有詩用蘇長公過清虛堂韻走筆奉答
築隄不擬長安沙鳴鼓已放西曹衙夜遊涇南鶴城北
隨處幅巾宜看花花林高下映叢冢池臺舊屬淇水家
當時笙歌沸鄰里只今古樹啼寒鴉先生讀書洞千古

過眼富貴如春葩時人不識競模擬往往背癢連衣爬
消憂滿貯北海酒破悶亦有南山茶家生小奴解新曲
時復羯鼓當軒搥郵筒往復方此始一唱何止三人嗟
詩成揮翰向落日墨光繞筆飛玄霞

題計郎中汝和墨菊曹汝學家藏

郎中畫菊真是菊蒙泉蒲萄太常竹一時能事并馳聲
豈直文章難繼續狂揮急掃皆稱意不特品高機亦熟
西涯坐間生色障一見當時已心服不知何日到君家

淨洗朱鉛鬪清淑，疎篁古木交映帶。深淺生枯俱入態，
歛風一枝驚欲折。倚竹數叢如有待，飛鸞墜羽時自壓。
老蛟蛻骨令人駭，張顛草聖久寂寞。何意茲晨忽傾蓋，
郎中郎中今有無。後來尚遠眼中疎，柔肌脆骨爭媚嫵。
不然蔓草紛黃壚，頽波一去誰與返。把卷撫玩增長吁，
君不見近來淮海上，亦有菊花一派往往傳京都。

冬至謁陵次三江送行韻

初陽映雪暖欲蒸，千門瑞氣通諸陵。朝廷報本嚴奠掃，

秩禮遠自前王興秋霜春雨意慘慘奩香篋帛心兢兢
高皇統天祀萬世奮自隴畝揮戟矜兩都竝建始文祖
鼎命重為諸孫凝傳聞橋山初啟邑鸞輿玉趾幾降登
小臣何幸得將事敢論暑雨仍寒冰經塗百里淨如埽
輿夫踴躍誇力勝迴龍小憩纔半道瞬息已覩洪仁燈
入門弛擔隨所適東寮西館各有朋山僧頻見頭亦白
為我載演牛車乘寒光凌亂入牕戶起視海月摩空升
瑤宮銀闕自萬古雖有晦蝕無虧增嫦娥悄立如有恨

欲斬桂樹嗟誰能齋居元不礙酬詠公詩險語何層層
磨崖擬刻永昭頌挽斷千仞寒谿藤

畫馬為內學生題

穆穆嫩綠垂楊短冉冉晴沙御堤軟驂騶行慣穩不驚
圍人徐牽不教遠飛黃食料三品豐青絲綠首飄風駿
曾見沙場征戰苦方知此物是真龍

筠屋為徐庭美賦

徐君愛竹如愛玉種竹成林密如束林間結屋三四楹

自說此生心事足闌干一徑曲復曲落翠飛青暗人目
我疑月明深夜中定有青鸞屋頭宿

送謝司倉

寧知信宜邑乃在古高州地接朱鳶近天連碧海浮官
倉餘火米土俗罷綿裘莫作炎蒸慮男兒重遠遊

春日將適郊外忽暴風阻行

二月六日天氣惡卷地黑風吹倒人却看花柳俱無色
忽訝江山不似春高卧野人滋嬾散欲飛燕子自逡巡

東園有約不如意須待來朝理釣綸

家僮摘槐芽

小奴攜筐綠掩苒斜日歸自東鄰家青精未試仙子訣
冷淘的見詩翁誇人間正味竟何在天地育物真無涯
紫萸青苻更不惡高秋誰泛三江槎

題曲水草堂

二首

曲水村中景最幽也宜杖屨也宜舟白沙翠竹灣灣路
楊柳芙蓉歲歲秋

紫蟹行沙菊有霜紅蓮登岸白蓮香何人謾說桃源好
便有桃源是異鄉

送宋惟德分教池州

池陽風物似長沙第一名山是九華輸與能詩宋文學
芙蓉影裏岸烏紗

鄭岳八首

岳字汝華莆田人弘治癸丑進士歷官兵部左

侍郎有山齋淨橐

謝山子云侍郎深於諷喻之體

塞下曲

引弓兒騎射奄忽若星馳朔風吹馬來四面衝我師我
師勿輕動持滿以待之佯北勿輕追恐為彼所欺

九江阻風泊舟有感

白浪起層層峰頭雲正黑迴舟入小港聊茲一憩息路
梗難為期滄波浩無極坐觀北來船帆挂千仞直篙工
意閒暇津津動顏色緬懷造化心施予難為力往船風
宜南來船風宜北南北本異途彼此那俱得物理每循

環明朝未可測隱几澹無營冥心悟義易

過水口

建溪昔隱險橫流多怪石參差列牛馬廉利侔劔戟篙
工慣習水禱賽資神力前後互招呼分寸恐或失激盪
轟雷鳴沫流飛雪白諦觀毛髮豎一命試輕擲逶迤過
水口灘盡溪流碧權歌發清響貫酒娛西夕患至慮煩
紆險過事愉懌物理固其然臨流長太息

安肅南山有劉伶墓碑

鹿車一壺酒荷鍤以自隨云死即我葬曠達不可羈如
何此墟曲有家高纍纍刻石紀道旁無乃好事為沈酣
弃禮法車服焉得維遭危固有託舉世人莫窺苦節多
湮沒怪爾名獨垂

秋水歎

黃河橫溢縣成渠人家半在水中居水邊漁父持空網
吁嗟無稻復無魚鄰居相望隔河汜借貸無從飢欲死
樓船伐鼓晨夜過怒向縣官索夫米

江行即事

府江江水惡一歲九經過
近午霧方散中流石更多
漁樵荒舊路豺虎據深窩
最念沿江戍天寒獨枕戈

野望

病告捐微祿官閒帶舊銜
提攜惟藥裹嬾漫廢書緘
海闊浮孤嶼天空挂一帆
吟眸隨處著秋色滿衣衫

簡姑蘇陳粹之憲副

吳苑鶯花滿舊墟
先生翻笑出無車
一官棄去還憂國

十口飢來只賣書
短屐香生莎徑暖
疎欄雲傍草堂虛
息息登拜慙子晚
更報詩筒候起居

秦金一首

金字國聲無錫人
弘治癸丑進士累官太子太
保南京吏部尚書贈少保謚端敏有鳳山詩集

落葉

半庭黃雜半庭紅
萬點飛來禁苑東
祇愛玉河秋色好
不因搖落怨西風

吳一鵬六首

一鵬字南夫長洲人弘治癸丑進士累官太子少保南京吏部尚書贈太子太保謚文端有集

詩話尚書名位與原博濟之鼎峙中吳詩雖不敵原博品在濟之伯仲之間原博闢一鶴園於都下中有玉延亭海月菴及以憂去推尚書居焉趙栗夫過之謂其亭曰借玉謂其菴曰借月尚書詩所云乾坤浩蕩誰非主丘壑風流我所私也詩集十卷選家罕有錄之者

塞上曲

去年搜河套今年搜河套河套水草多反以資寇盜歎

息漢將軍旌麾幾曾到

官軍行

團營素操練精銳稱禁軍平時跨鞍馬揚揚氣凌雲
山東苦多盜勢將及并汾上怒乃遣將徂征如救焚云何
負委託寇至若罔聞畏縮解鬪志久不樹功勲遂令萑
苻輩所在皆成羣生能拔牛角古不有孟賁死能鞭荆
尸古不有伍員賈勇今已矣肉食徒紛紛民間且被害
敢怒不敢云黷貨殘富室肆淫裂完裙忍以盜攻盜罪

惡何區分勸汝早悔過直前破妖氛所貴出死力奏捷
慰吾君

知足篇戲效樂天

我生幸為男魚米况鄉俗恬然熙洽餘蹤跡混樵牧父
母教我書早已竊君祿優游翰墨林職業少拘束退朝
時閉門爐茗清可掬有書讀幾章有紙揮幾幅有酒飲
幾杯有詞歌幾曲客來或棊枰家居祇常服且有膝下
兒家聲亦能續俯仰天地間我意無不足敢云求大官

朱軒映華屋福過災恐生撫已覺顏忸吳江舊遺田聊
以具饘粥為賦歸去來奚俟詹尹卜

過李海務

海國茫茫裏輕帆整復斜楊花低度水萍葉細黏沙魚
米三家市風烟一樹鴉不須嗟落寞吾意本天涯

開河阻船慰同行諸君

水宿風餐君莫愁他鄉聊復當春游花間啄食鳥紅尾
沙上浣衣僧白頭三戶人烟看漠漠百年身世任悠悠

關河過此知無礙萬里長風吹客舟

查夏重云三四極似子瞻

節後見菊

重陽已過十餘日纔見疎籬菊有花厭逐紛華供俗眼
獨留冷淡伴詩家清霜數朶水邊淨落日一枝風外斜
為汝秋深慰蕭索酒酣聊取插烏紗

曹

鏞四首

鏞字良金吳江人弘治癸丑進士改庶吉士授
刑部主事進員外郎調東昌府通判遷興化府

同知擢湖廣按察司僉事有林歸集

蔣慕皆云
太史詩不

學唐不擬選而寓
託深至迥出意表

詩話良金仕未通顯而能力攻中貴人直節不
易及歸田之後娛情繪事興到題詩於所居宅
後積土為山植桐其上名曰桐丘句如一片酒
旗春雨店數聲漁鼓夕陽村鵝翎白緞霜前菊
鱸血紅生雨後柑剪紙為屏遮破壁牽蘿補屋
透斜曛軒牕影暗梧桐密籬落香飄枳殼開漁
鼓喚人敲轉急酒旗招
客挂偏高頗類白石翁

楊白花

楊白花輕且微春風吹逐何處飛春陰冥濛千萬里花

小不愁飛不起重門深鎖寂無人夜永如年月如水

山家圖

茅屋青山裏居人不務耕雨晴攜短鋤隨處握黃精

秋郊晚眺

潮落寒江淺沙陂露水痕漁人歸曬網搗鼓入遙村

菊花

霜落天涯草木稀疎花秋晚獨芳菲平生不愛杯中物
嬾向西風望白衣

陸相一首

相字良弼餘姚人弘治癸丑進士累官長沙知府有吳舫集

寶應道中

百里平湖水輕帆次第過魚蝦攢曉市鷗鷺浴寒波霧塔籠鬢髻秋花豔綺羅十年淮海夢愁絕竟如何

許天錫一首

天錫字啟衷閩縣人弘治癸丑進士改庶吉士

授吏科給事中歷工科都給事中上疏劾劉瑾
為瑾所殺嘉靖中追賜祭葬有黃門橐

詩話黃門奉使安南却其贖賦詩云菁茅又喜
重包貢蕙苾何須滿載歸叱歸劉瑾疑其金多
不知其不受餽也黃門之死瑾矯詔逮問潛遣
人殺之而撰府志者或謂其自經或謂是夜尚
草疏皆謬當以世宗實錄為正鄭少谷詩云風
流不見許黃門遺字丹青閣上存却留詩句車
盤驛黃犢青山何處村蓋黃門過車盤驛曾題
詩壁間有青山對面疑無路黃犢出林知有村
之句為時所稱謝在
杭亦有詩紀其事

楊白花

春宮深深春晝長
楊花起舞春雲香
隨風忽度江南水
蕩漾楊花幾千里
楊花流落向天涯
宮樹朝鴉復暮鴉

杭濟二首

濟字世卿宜興人
弘治癸丑進士官至布政使
有澤西集

東溪小隱

清溪東畔隱君家
幽事人將擬浣花
垂柳蔭牆綠岸仄
短莎分徑入門斜
春風到處隨吟杖
秋水閒來放釣槎

了却百年終隱計更無飛夢到東華

柳枝詞

玉溝縈繞水烟涼嫩葉垂垂窳地長百尺宮牆遮不到
飛花猶自入昭陽

杭淮十四首

淮字東卿濟弟弘治己未進士累官南京總督

糧儲右副都御史有雙溪集

王道思云東卿詩雖體製錯出律調

不同而歸之嚴整雅健格高而意正音舒而節越無嫫媠之習粉澤之飾有前代作者之風

俞汝成云孝廟以還李何二公首倡詩學一時揚袂而起者如徐迪功熊士選康對山王浚川輩不啻數十家宜興杭澤西雙溪昆季亦同聲而應者也

詩話雙溪詩極其道鍊如繭絲抽自梭腸似澀而有條理五言尤擅場可亞少谷

復送世恩得鳥字

朔風吹客衣寒葉辭木杪晨發城東門君馬白驪裊南
北紛多岐聚散感鷗鳥蹤跡雖屢違毋使聲聞杳相望
江一涯素月出皎皎

送劉美之太守赴銅仁

園柳何青青江草萋以碧送子適萬里執手情脈脈嗟
彼雲中鴈翱翔依沙磧不為稻粱謀何以有南北努力
慎所之悠悠豈中隔

早發巢縣暮宿金城寺

烟靄市上青霜露草根白日出雞尚鳴墟落溪南北涉
野多寒風枯楊何蕭索山川莽迢遞歲晏道路迫王事
苦未休慘澹逾郡國暮逢禪房幽且復舒枕席

送王陽明謫官龍場驛

白日野中微浮靈結朝陰送子遠行役躑躅傷我心豈
無良朋傳不如子同音寂寞投窮荒誰能念浮沈願為
雙玉軫相隨麗瑤琴

送徐石東僉憲湖南分題得瀟湘

瀟湘他日夢

自注石東嘗
夢官于此

今上合江亭天閣浮吳楚山

青入洞庭鷓鴣春渺渺斑竹雨冥冥舟楫雲中見依稀
帝子靈

西行回度滇池

西行苦歷險落日放舟還海草微茫際沙鷗出沒間烟
青金馬寺天遠碧雞關諸嶺雲端出如看震澤山

打牛坪驛

諸葛孔明
迎春於此

亭因卧龍舊猶載打牛坪耕戰紆經略春秋幾送迎野
花空晚落蔓草自春生悵望三分蹟流傳後代名

山水小畫和韻

金碧披毫末江山入座中橋分沙岸水樹繞石林風已
覺滄洲遠還疑玄圃通生綃僅盈尺萬里對無窮

清平道中

亦知春久去花尚滿陵岡小朵穿籬白微風過馬香清
平蒙伐罪苗穉識尊王鹽米通吳蜀人今無異方

鎮遠喜即舟

連山霧不開壑轉一溪迴洶洶奔湍下濛濛細雨來巫
山疑有峽濫瀕不成堆撇旋看舟子乘流亦快哉

雨中登樓

節序黃梅候朝陰午不開浮雲暗山去急雨灑城來高

豔紅葵濕低翔白鷺迴洗心亭咫尺烟靄擁層臺

新正二日發宜春次王陽明韻

宜陽山前莎草痕春泥釋釋水流渾客行遠道無停轂
人拜新年不出村三日暄蒸北風作清朝陰霾江氣昏
野館蕭條亦足賴梅花為我招吟魂

經盤江次劉元瑞韻

踰岡陟嶺兼多病臘盡春來不記程瘴水已知多客淚
窮山只是有人行緣崖晝霧愁俱黑觸馬春花眼一明

西蜀未知天下險老夫筋力盡南征

王思槐過訪押韻

泊船郊扉暑雨清小樓山外恰新成打魚剪韭無他味
把酒論文見客情野竹過牆初挺拔林花照眼更分明
新禾滿地農歌起白首對君懷一傾

王良佐五首

良佐字良弼松江華亭人弘治乙卯舉鄉試選
靖海教諭遷知廣濟縣有鶴坡集

孫貞父云鶴坡雅志高古

庸腐語淘洗殆盡如古仙幻客超脫塵外又云
鶴坡抱負自許惜不用於世常有咨嗟慨歎之
意其詩超拔自

喜終欠沉實

詩話鶴坡與戚韶龍困張冕一桂同居松江之
珠涇咸有詩名孫文定刊三詩翁集行之王作
較勝其與儲黃論詩云幾許門牆黃太史三分
局面鄭都官其實派出石田頗饒清曠之致

招張一桂

日日草堂江上開竹間亦有小亭臺酒杯欲棄那忍棄
吾子不來誰復來案上離騷讀初罷坡頭獨鶴放仍回
湖山每索驚人句須得張郎八斗才

九日過九江

一舟西下繫垂楊
忽值黃花夾岸香
逢著故人汪太守
九江城裏過重陽

舟次

社公祠前五日雨
白馬湖頭三尺潮
客子掀篷正無賴
隔船何處一聲簫

暮渡江

沙頭燈火見樓臺
黃帽那堪隔岸催
舊日風流王博士

又吹長笛過江來

紅牡亭

沉香亭北午風微
香霧濛濛燕子飛
三十六宮春色好
大家齊試絳羅衣

明詩綜卷三十一

欽定四庫全書薈要卷二萬五百五

集部

明詩綜卷三十二

翰林院檢討朱彝尊編

許讚一首

讚字廷美靈寶人弘治丙辰進士累官少傅兼
太子太傅吏部尚書文淵閣大學士贈少師謚
文簡有松皋集

感遇

主人凌晨起灑掃坐當楹屋東有茂樹其上鳴鳥鳴主
人心所惡彷徨巡檐行亟命伐此樹庶幾遠惡聲僕言
梟可射樹伐難再榮毋以小失大事當論重輕

劉麟一首

麟字元瑞本安仁人先世以武功襲南京廣洋
衛副千戶遂家焉中弘治丙辰進士除刑部主
事歷員外郎中出知紹興府削籍徙居湖州起
知西安府擢雲南按察使謝病歸尋起太僕寺

卿遷副都御史巡撫直隸復引疾再起大理寺

卿改刑部右侍郎陞工部尚書卒謚清惠有南

坦老人集

王元美云元瑞詩如癡女兒能織鴛鴦自謂藝絕改繡鳳皇更無此鳥可

以發笑

靜志居詩話尚書由二千石登三九之列數棄官以去好為山水之游流寓長興之南坦自號

坦上翁與孫山人一元龍僉事寃及苔中名士吳琬施侃等結詩酒社號苔溪五隱年八十餘

被褐坐小舟赴岷山會人不知為鉅公也嘗請浚川預作墓銘可云達天知命者矣顧華玉贈

詩云琴鶴居何定蓴鱸味獨偏王履吉寄詩云鸞鶴詩真賞瑤華贈遠人孫太初詩云閉門句

好香殘後持藥聲高月
上初其風流可想見也

南坦讀書臺

盡洗侵輿竹來聽轉壑泉
萬花齊映谷五柳欲飛絲
弱子將迎婦鄰翁許借錢
讀書臺下雨種玉比藍田

陶諧一首

諧字世和會稽人弘治丙辰進士累官兵部左
侍郎贈尚書謚莊敏有南川漫游臺

詩話南川詩未知津數
與空同酬唱吾服其謄

晚宿峽石

迢遞羣山合，逶迤一徑通。
半村無夕照，空谷自天風。
轍亂哈呀上，年衰道路中。
客懷增闕寂，新月翳疎桐。

劉玉十二首

玉字咸栗，萬安人。弘治丙辰進士，除知輝縣，入
為御史，歷南京左僉都御史，董江防，後至刑部。

左侍郎有執齋集

楊用修云：古詩歌行，妄帖排弄，入古作者之室，五七律

雖唐人何多讓焉

詩話康陵南巡將臨新文僖喪詞臣撰祭文均
不稱旨御製文云朕居東宮先生為傳朕登大
寶先生為輔朕今南游先生已矣嗚呼哀哉當
時代言之臣咸斂手歎息嘉靖中王新建沒執
齋侍郎作祭文云嗚呼公之才拔乎其萃嗚呼
公之學出乎其類嗚呼公之功疇克似之嗚呼
公之壽竟止於斯亦可謂言簡而意盡矣執齋
當宸濠之變正理江防馳檄師中與喬莊簡椅
角克固疆圉其功有足錄者詩
頗娟秀絕塵比於莊簡似過之

夜坐

暝色閤琴書
開軒對明月
微雨卷薄雲
疎星粲成列
孤蹤棲鳥定
羣響蟲聲歇
緬懷塵外人
高枕宵鐘徹

祕獄

牆隙風來無蹤翻書卷衣袂使我燈燄閃爍如青蟲嗟
風伯來何從清明庶成化工乾坤大噫土囊小何為
牆隙如吹筒嗟嗟風伯省厥躬

百舌

百舌鳥何佻巧啼遍上林音裊裊鳩鳩喚雨雄鳩晴鷓
鴒欲住鴝欲行一鳥一舌尚難定爾有百舌能無爭人
生言出慮禍入一言之失駟不及三寸舌在中禍機喏

爾百舌無是非

志怪

紀歲丁丙戌夏四月廿六靖浪之民家黃牯身孕犢一
項而二首各具口耳目五月十四日丙申金壇農婦生
怪人頭方四角面青而六眼高額凹鼻獠牙鳥喙如山
精手足一節具一爪墮地鬼叫連三聲歛然起走擊乃
斃創見此怪吁可驚七月望仍丙申日異牛又產南陽
邑二首相同項亦分心肺雖分身尾一聞之嗟嗟稽古

書無乃世降生形殊反身修德天可格祥桑枯死安無
虞

石鍾山歌

石鍾山何高哉雙巖競秀江之隈初疑端人秉笏立朝
署又疑靜女把鏡臨妝臺長江萬里如奔馬彭蠡淵泓
匯其下乾坤陶冶質本虛波濤撞擊聲非假春風浩蕩
秋月明蛟龍鼓舞鯨鼉鳴或如巨鏞震東序或如棧劇
和琴笙水石相搏豈人力石鍾千古留佳名山僧叩石

誇竒絕南音含胡北清越山川靈異石偶同至理寧容
三寸舌我來訪古將誰從酈元李渤東坡翁枕流洗耳
了無得倚闌目送雙飛鴻忽憶高皇此停蹕龍旗一掃
羣兇畢鐘乎鐘乎爾善鳴為予汛埽磨厓石

聞甘肅有警寄榕溪公

驛吏傳邊報羌人犯肅州極知兵士苦誰解聖明憂調
集晨分竈供輸夜唱籌早期青海靖定遠舊封侯

寄咸肅兄

江頭日日候歸船
南北東西路幾千
旅館夢迴常徹夜
故園書去動經年
愁連郢樹雲初合
思入湘潭月又圓
莫道少年堪久別
高堂華鬢亦蕭然

越王臺

章遂江流去不回
江邊今有越王臺
年深往事憑誰問
春盡野花空自開
落日每隨孤鳥沒
好風時送片帆來
登臨却喜青山在
猶勝阿房化劫灰

顏瓌墓

顏公沛令廬陵人也
建文末死

社稷安危隻手支綱常輕重此心知未驅玄武門前騎
已拔丹陽鎮上旗千古夷齊真義士百年忠孝有佳兒
荒墳偏灑行人淚泗水東流無盡時

蓮花澱

平堤一望盡湖光橋北橋南路短長漁父水中圍曲箔
行人冰上引拖牀

送行

日日都門送別離道傍楊柳已無枝西飛白日東流水

不放行人住少時

懷歸

鑑湖之水清且漣中有二頃桑麻田
故人有約不歸去
老却黃花又一年

黃 衷 三首

衷字子和南海人弘治丙辰進士歷官兵部右

侍郎有矩洲集

鍾仲實云矩洲歷官所至皆有題咏晚年謝事丘皋寄興不倦

其詩整而俊婉而有則宏博而不肆

詩話矩洲詩無根核興到筆酣間與曩篇暗合
若野練晴飛孤嶼白木棉春試小枝紅白酒河
橋花底社黃螺沙市蠻家兒處處短坦團壯礪
家家生計種扶留鳥際忽開衡岳寺林端恰下
灌江船桐木歸來津口渡楊花飛
過驛南樓狀南中風景歷歷在目

益陽紀事

潭州楚南郡獷黠俗易敵伊昔炎宋時控禦恒置帥惟
我神聖朝綏靖亦數世去年五百峒椎牛立赤幟居氓
棄業走行旅盡心悸俄聞益陽菁倡亂渠首二敢叛假
息恩遂揭怒車臂豈緣科率煩厥咎在長吏我時移鎮

來集議詢根蒂米聚山川形陣列犄角勢圍夫里抽壯
甲長家舉義風霆驅號令狼兕各殲殪鷙猛安可常覆
轍戒前事慎爾血氣軀毋使腰首棄

萬縣

川東十數州此地事征權醜販浮大航蠻賈日交錯算
緡及銖釐刺穎倒囊索追惟作法誰主者乃倅幕先王
御盛世賦稅且云薄未造計舟車諒非明哲作刀錐將
盡爭何以裒民瘼厲禁如可除商旅永和樂

雨

自從人日雨漠漠
洩旬連漸綠磯
頭草仍迷夏口
船雷聲喧浦近
農事憫時先
楊柳東門色
春寒幾度眠

湯沐一首

沐宇新之江陰人
弘治丙辰進士
除崇德知縣
入為御史累官
大理寺卿有廷尉集

秋日寫懷

黃菊秋來已滿籬
青山於我久相期
孤燈對酒不成醉

遠道逢秋更覺悲，祇恐病侵垂老日。不妨貧過未官時，
沅湘欲趁東歸櫂。竹杖芒屨任所之。

陳霽一首

霽字子宇，吳縣人。弘治丙辰進士，改庶吉士，授
編修。忤劉瑾，勒致仕。瑾誅，復館職。歷國子監祭
酒，有玉堂成均歸田諸橐，燬於火，僅存葦川集
藏於家。

詩話：祭酒古之遺直，為史官時，面責劉瑾，謂古
者刑不上大夫，大廷非行杖之所。且言劉公健

謝公遷皆顧命大臣君無故一旦去之恐非所以保貴富之道瑾對以廷杖正統年有之公曰此姦邪王振所為爾瑾爭曰王振死土木之難忠臣非姦邪公作色曰此賊幾覆社稷何忠之有瑾曰編修借振罵我邪銜之欲置公死地以丁母憂僅免其後又劾江彬幾為彬所陷歸田澹退尤人所難詩草被焚從其裔孫錄手彙一首

過楊二郊居

白石芳郊路清谿舊竹扉橋通湖水近樹入隴雲微蘋
葉漂波冷鱸魚上釣肥村醪沽不遠落景未言歸

熊卓三首

卓字士選豐城人弘治丙辰進士授平湖知縣

徵拜監察御史有熊御史詩選

王元美云熊士選如寒蟬乍鳴

疎林早秋非不清楚恨乏他致

顧玄言云侍

御才華警拔一句一字酷尚初唐已得王楊風

采特少深致穆敬甫云熊詩如西子解顏萬

夫婉孌黃清甫云卓詩所存最少不過四十

篇出自北地所刪殆無遺珠矣而不

足以振然其短調楚楚亦自清發

詩話張光世集為康德涵所定熊士選詩為李

獻吉所刪兩君俱有才名不應牽率若是疑所

汰者金而所

存者沙矣

送王行之還陝和廷實韻

擾擾郊門道沙寒驛路微煙花行客晚京洛故人稀野
岫孤雲沒春山獨鳥歸秦川隱關塞一望一沾衣

出居庸

沙上望行人日暮愁心絕江南四時春邊地五月雪

送客城南

楊柳河橋外春風倒玉壺離情不可道江路滿蘼蕪

趙鶴二首

鶴字叔鳴江都人弘治丙辰進士歷官山東提

學副使有具區集

顧華玉云叔鳴詩恥凡語於古愛謝靈運於唐愛孟郊於

元愛劉因嘗曰此道不宜淺淺則庸冗下矣其登泰山金焦諸篇言言自作更不隨人真凌駕

千古膽也

詩話李獻吉登岱詩日抱扶桑躍天橫碣石來宗子相稱之謂有芥視岱宗斗量滄海之致若叔鳴山壓星辰從下看海浮天地自東迴亦警句也

登岱

一上遙岑萬丈蒼
天風應為襲衣裳
雞鳴往往看初日
人語時時到下方
雲暗鐘聲連海樹
春浮花氣入山堂

扶藜不淺登游興，祇怪輿丁喚客忙。

蓬萊閣觀海

蓬萊高閣晚涼開，倦客乘涼坐未回。
不住鳥聲衝雨過，有時龍起帶潮來。
愁雲尚識田橫島，仙月還虛漢武臺。
回首夕陽瀛海上，一尊懷古獨徘徊。

汪循一首

循字進之，休寧人。弘治丙辰進士，官順天府通

判。有仁峰文集。

老去

老去心還競春來花又新未應行樂地偏愜少年人

戴銑二首

銑字寶之婺源人弘治丙辰進士官南給事中
以論劉瑾削籍贈光祿少卿

武城晚眺

野曠蒼煙合城昏白日斜
幕隄千樹柳負郭萬人家
小舫明漁火高樓隱暮笳
寂寥江上立羈思滿天涯

經古鄭州

城勢尚蜿蜒風光異昔年民垣官舍瓦兔穴戰場田古
樹無秋色殘碑有暮煙興衰亦常理臨眺却淒然

朱 諫八首

諫字君佐永嘉人弘治丙辰進士歷官贛州知

府調吉安謝病歸有蕩南集

俞汝成云君佐詩多自得之趣不規

規於聲調律格

詩話蕩南近體足自名家

清明日泊揚子江

楊柳夾江青
東風潮正平
雲間旋蜃市
沙際聽鼙更
萬水俱東逝
孤舟更止征
不知時序改
今日是清明

入清河

柳葉初凝綠
桃花正滿林
河流移故道
海色變層陰
午夜一帆月
征人萬里心
風沙吹欲老
短髮不勝簪

寓江心寺

孤嶼清秋夜
星河萬里查
江山如有約
雲水暫為家
白

髮隨鷗鳥輕舟采石華秋風動歸思浙瀝響蕙葭

冬日奚蘭室老友見訪喜而有作

江村寒月客來稀坐對梅花半掩扉燈火最憐清夜話
溪山偏愛舊人歸酒樽欲盡還堪瀉世路無情已息機
相見不須悲白髮山林鍾鼎總成非

章孝夫鴈麓山莊

陰陰竹樹繞山根石徑雲深蕩北村無數落花浮水面
盡隨鷗鳥到柴門鉤簾靜對千峰月種藥新開五畝園

長日南窗事高卧謾將風景說桃源

瑤川新漲同魏海南泛舟

草煖風和二月天江南鰕菜不論錢
前溪昨夜添新漲一葉中流范蠡船

夜坐

金爐火盡不聞香銀燭無光春夜長
想見落花千萬朵盡隨風雨下池塘

寄曾良用

幾度南樓坐夕曛十年消息隔江雲歸來又向江頭別
只見梅花不見君

黃相一首

相字弼甫莆田人弘治丙辰進士有一溪集

槿樹花歌

日出花始開日沒花已落明日花開笑落花不知向暮
還如昨人間勢利自有時田實相傾徒爾為獨不見東
陵瓜達人守法奚咨嗟子如不我信聽歌槿樹花

唐 錦一首

錦字士綱上海人弘治丙辰進士除知東明縣
入為兵科給事中歷江西提學副使有龍江集
近山

卜得幽居傍翠屏
澗泉偏愛枕邊聽
曉來嵐氣衝簾入
濕透牀頭相鶴經

唐 寅九首

寅字伯虎一字子畏吳縣人弘治戊午舉南京

鄉試第一坐事下獄放歸有六如居士集

顧華玉云

伯虎棄落之餘益任放誕殉節體物託興歌謠
罔避俳文務諧里耳雖作者不尚其辭君子可

以觀其度矣祝希哲云子畏詩初喜穠麗既
仿白氏務達性情佳者多與古合表永之云

子畏築室桃花塢中讀書灌園家無儋石而客
常滿坐風流文采照映江左謂人生貴適志何
用劇心鏤骨以空言自苦故其著述多不經深
思語殊俚淺王元美云唐伯虎如乞兒唱蓮

花落其少時亦
復玉樓金埒

詩話六如淪落明時恒賣畫為活故其詩云領
解皇都第一名猖披歸臥舊茅衡立錐莫笑無
餘地萬里江山筆下生又云青衫白髮老癡頑
筆硯生涯苦食艱湖上水田人不要誰來買我

畫中山誦之悽然足以悲矣然於畫頗自矜貴不苟作而詩則縱筆疾書都不經意以此任達幾於游戲此表永之輯其集僅存少年之作實未足以盡其長余於集外從畫卷錄其留題絕句八首饒有風致未至如乞兒唱蓮花落也

驄馬驅

悠悠驄馬驅道阻歲云晚豈無同袍士念子不能飯木落辭故枝去家日以遠鳴雞戒前途夕暝猶策蹇筋力已非舊淚下不可卷

題雲山煙樹圖

雲山煙樹靄蒼茫
漁唱菱歌互短長
燈火一村雞犬靜
越來溪北近橫塘

贈感慈鄒先生畫

騎驢八月下藍關
借宿南州白塔灣
壁上殘燈千里夢
月中飛葉四更山

呈何先生畫

青雲閣榭泉聲隔
黃葉關河鴈影來
別有詩人好懷抱
西風雙鬢一登臺

曉起圖

獨立茅門嬾拄筇
鬢絲涼拂豆花風
曙鴉無數盤旋處
綠樹枝頭一綫紅

野寺

野寺空林落照低
微鐘煙樹使人迷
逢僧只道山門近
不覺穿雲又過溪

雪景

重重樓閣凍雲連
煙樹蒼茫帶瀑泉
一夜空山千丈雪

草玄人在玉壺天

墨菊

故園三徑吐幽叢
一夜玄霜墮碧空
多少天涯未歸客
借人籬落看秋風

題畫

日長深閉竹廬眠
席下猶餘紙裹錢
檢點雞棲牢縛草
夜來有虎飲山泉

劉龍一首

龍字舜卿襄垣人弘治己未賜進士第三累官
南京吏部尚書贈太子太保謚文安有紫巖集
送謝同年邦用之湖廣僉憲

曲江花底記同遊十五年來鬢欲秋楚國旌旄新寵渥
謝家人物舊風流君山雨霽簪螺髻漢水春深漲鴨頭
樽酒已空山已夕微茫煙樹隔仙舟

林廷棹 一首

廷棹字利瞻閩縣人弘治己未進士歷官太子

太保工部尚書贈少保謚康毅有小泉錄彙

江南曲

鳥鳴花樹綠春滿江南道不見花下人但坐原頭草

蔣 瑤一首

瑤字粹卿歸安人弘治己未進士由御史出知
荆揚二府累官工部尚書加太子少保卒謚恭
靖

詩話康陵南巡近侍希帝意旨欲刷民間女子
恭靖公知揚州府事語江彬等曰揚州女子少

多受聘不便奪之無已則知府一女在得旨斯
進耳乃罷時山陰汪清憲先生知泗州中使傳
旨令進美人善歌吹者先生奏言泗州婦人荒
陋無可應勅臣向民間訪柔婦儻納之宮中俾
受蠶事庶於治化有裨事亦得寢二公彊直頗
相類而康陵未嘗震怒亦足見帝德之寬大矣
相傳駕旋時恭靖為彬等繫於舟中三日不食
驅令送駕所騎馬受奪止攜一被墊驢背夜則
寢焉抵臨清徒跣行岸上康陵遙望見之曰是
蔣知府邪可速遣還方得免維揚人感之入髓
春秋尸祝至今恭靖以宮保尚書予告林居者
二十年入峴山社詩不多作惟秋社一律僅存

丙午秋社和我齋半溪聯句韻

湖上閒居繫遠心羣公蘭楫幾回臨
衣冠聚處多鄉里

存沒筵前換古今野寺浮橋煙樹暝斷碑斜日蘚苔侵
從教津鼓催歸數且倚窪樽亭柱吟

孫緒一首

緒字誠甫故城人弘治己未進士歷官太僕寺

卿有沙溪集

李時遠云沙溪瀛洲才子所作清新典麗足以名世

詩話沙溪無用閒談足資國史之采擇詩不見佳

居庸關官舍

一徑中開萬里橫居民無地問農耕霜催木葉晚山赤

雨溜石苔秋水清沙鳥遠從天外度寒蛩苦愛夜深鳴
峰巒徙倚休回首何處孤雲是故城

王守仁十首

守仁幼名雲生字伯安餘姚人弘治己未進士
授刑部主事改兵部坐救戴銑忤劉瑾杖闕下
謫貴州龍場驛丞旋復南京刑部主事改吏部
歷員外郎中遷南太僕少卿轉鴻臚寺卿拜左
僉都御史巡撫南贛陞右副都御史論平宸濠

功擢南兵部尚書封新建伯卒贈侯謚文成從

祀孔子廟庭有陽明先生集

王元美云伯安詩少年有意求工而

為才所使不能深造而衷於法晚年歸於道學尚為少年意象所牽不能渾融而出於自然自負若兩得而吾以為幾於兩墮也又云王伯安如長爪楚志彼法中錚錚動人穆敬甫云王公功業學術振耀千古固不必論其詩而詩亦秀拔不可掩其殆兼舉哉又云王詩如披雲對月清輝自流顧玄言云先生經國大手博學通達詩非所優然有幽思逸致陳卧子云文

成才情振拔少年頗擅風雅自講學後多作學究語遂不堪多錄

詩話新建勲業氣節文章皆可甲世特多講學一事讒言惟興彝尊少聞先君子之言矣心齋

顏子之學也良知不動心孟子之學也大學思復戴鄭之舊定論莫息鵝鹿之爭仁智之見各殊楊墨之歸斯受其後流而為禪者門弟子之過也今就先生之詩觀之其過濂溪祠云瞻依多少高山意曾向圖書識面真讀易詩云乃知先天翁畫畫有至教題武夷壁云溪流九曲初諳路精舍千年始及門示程畢二子云紫陽山下多豪俊應有吟風弄月人則先生何嘗立意樹幟張弧與洛閩諸儒異乎乃訾訾之口以先生學術未純并先生大節疑焉皦皦素絲欲染為緇彼譖人者亦太甚矣

山石

山石猶有理山木猶有枝人生非木石別久寧無思愁

來步前庭仰視行雲馳行雲隨長風飄飄去何之行雲
有時定游子無還期有生豈不苦逝者長若斯已矣復
何事商山行采芝

諸生

人生多離別佳會難再遇如何百里來三宿便辭去有
琴不肯彈有酒不肯御遠陟見深情寧子有弗顧洞雲
還自棲溪月誰同步不念南寺時寒江雪將暮不記西
園日桃花夾川路相去倏幾月秋風落高樹富貴猶塵

沙浮名亦飛絮嗟我二三子吾道有真趣胡不攜書來
茆堂好同住

寄友用韻

懷人坐深夜惟燈暖幽光耿耿積煩緒忽忽如有忘玄
景逝不處朱炎化微涼相彼谷中葛重陰殞衰黃感此
客游久經年未還鄉伊人不在目絲竹徒滿堂雲深鴈
書杳夢短闕塞長情好矢無斃願言覲終償惠我金石
編徽音激宮商馳輝不可即式爾增予傷馨香襲肝膂

聊用中心藏

別湛甘泉

行子朝欲發驅車不得留驅車下長坂顧見城東樓遠
別情已慘况此艱難秋分手訣河梁涕下不可收車行
望漸杳飛埃越層丘遲回岐路側孰知我心憂

古道

古道當長坂肩輿入暮天蒼茫聞驛鼓冷落見炊煙凍
燭寒無燄泥爐濕未然正思江檻外閒却釣魚船

興隆衛書壁

山城高下見樓臺野戍參差暮角催貴竹路從峰頂入
夜郎人自日邊來鶯花夾道驚春老堆堞連雲向晚開
尺素屢題還屢擲衡南那有鴈飛回

元夕

去年今日卧燕臺銅鼓中宵殷地雷月倚苑樓燈彩淡
風傳閣道馬蹄迴炎荒萬里頻回首羌笛三更謾自哀
尚憶先朝多樂事孝皇曾為兩宮開

龍潭夜坐

何處花香入夜清
石林茅屋隔溪聲
幽人月出每孤往
棲鳥山空時一鳴
草露不辭芒屨濕
松風偏與葛衣輕
臨流欲寫猗蘭意
江北江南無限情

寄浮峰詩社

晚涼庭院坐新秋
微月初生月滿樓
千里故人誰命駕
百年多病有孤舟
風霜草木驚時態
砧杵關河動遠愁
飲水曲肱吾自樂
茆堂今在越溪頭

山中示諸生

桃源在何許西峰最深處不用問漁人沿溪踏花去

周倫一首

倫字伯明崑山人弘治己未進士累官刑部尚書贈太子少傅謚康僖有集

雨霽登馬鞍山

春暮日始霽尋幽憩山牀洞壑石衣冷幡幢松雨香悠然倚雲閣極目塵沙場

張琦七首

琦字君玉鄞縣人弘治己未進士除南大理評事歷寺正陞興化知府歷福建左參政致仕有

白齋竹里館二集

王元美云張君玉如夜蛙鳴露自極聲致然不脫淤泥中

李景堂云先生詩吐咀山川驅使雲鳥草木與一時詞人絕不同

詩話白齋於李何詩教盛行時別出機杼專以宋人為師句如人到閑年一過客吾當十日九揮毫千村土犬月照雨半夜江魚潮入田天上星辰離舊次夢中山水作真游離歌對酒無三疊殘暑先秋退一分十里長亭留短樹滿天晴日落黃沙濕螢燄竹火依火疲馬出郊山復山

路入秋低潮裏樹山行月黑虎窺人殘年滯雪
開新歲五日敲冰過一州古刹今僧相見少新
篁舊竹長來齊水邊地冷苔生髮山外民貧竹
有花入之誠齋安晚集中猶上駟也弇州方之
夜蛙鳴露說者以為過而白齋出郭詩云
一部新詩一部蛙則作者先以自喻矣

遊長山

偶偕羣從遊騎馬秋山冷笑語應谷聲揚鞭亂江影入
山尚未深而有山棲境紅子落長藤蒼苔覆笱井短棘
刺我衣朔風吹我領飢腹覓蕨根健步出松頂樵人四
五家炊煙忽生暝問樵何處山云是丹霞嶺龜勉越崇

岡豁然見高景飛鳥盪宵至浮雲暗生脛陟高原自平
可以發深省

黃昏步溪上見煙月可愛

明月在天煙在溪煙中看月無光輝沙禽熟眠潮未響
野火歷亂船初歸天邊楊柳誰家樹煙月相含不知數
此時幽景記不真莫是江南夢歸路

次夜又步溪上

月夜不減昨夜好秋霽家家夜飯早蔓青芋子白酒香

土門竹舍黃花老農談悠悠靜可聽皆說官家今太平
斗斛上倉不過槩差船點馬無兼丁翁哺弱孫婦抱子
依依相對桑麻裏我願明月常此光不照離愁照歡喜
秋晚登君山
十年兩醉君山酒山下民風似昔年青帕茜裙耬麥女
銀鱸紫蟹入村船霜焦葉破猶藏寺江浦沙高未作田
病骨登臨尚彊健坐聽湘瑟弄湘煙

梨園教曲圖

梨花千樹雨初收
上苑春風吹未休
新製樂章音調澀
敕教依舊唱伊州

合和驛南望彌望皆白土

當時戰血有餘腥
白土經年草不青
留得遺民幾家在
夕陽村裏掘蕪菁

溪家

紫絮茅花飛入門
淺溪幽響出籬根
溪家老婦閒無事
落日呼歸白鼻豚

都 穆一首

穆字元敬吳縣人弘治己未進士授工部主事
歷禮部郎中乞休加太僕少卿致仕有南濠詩

略

顧華玉云少卿文簡古有法詩雖故爾沖泊
竟非俗韻 胡孝思云元敬詩宗陶孟

詩話祝希哲九朝野紀徐昌穀剪勝野聞往往
紀載非實惟都少卿南濠文跋西使記金薤琳
琅聽雨紀談事必稽核蓋篤學之士也相傳吳
中有娶婦者夜大風雨滅燭徧乞火無應者衆
皆曰南濠都少卿家當有讀書燈在叩其門果
得火齋居乏食笑曰天壤間當不令都生餓死
先民風節如是詩
無足錄存豹一斑

吳江竹枝詞

雙櫓艤船無比輕耳邊惟聽踏車聲
龍王堂下風波惡誰似儂心耐得驚

張鳳翔一首

鳳翔字光世洵陽人弘治己未進士除戶部主
事移病歸卒年三十有伎陵集

詩話伎陵集洵無足錄蒙叟誚獻吉黨護作傳
然其集本獻吉評點初不假借不以為近能即
以為太寔或譏其篇章雖多事重意複或評其
蘊蓄有餘變化未至惟卷末數篇云流動工緻

所謂吾見其進也是無異師之視弟子若其文
有擬彭澤士夫送陶潛解任歸序詆之曰此篇
疑未覩歸去來辭而作則侮人太
甚矣蒙叟黨護之論殊不其然

宮詞

社燕花梢翠尾分玉樓斜度語朝曛卷簾忽趁東風入
誤落芹泥濕鳳裙

謝廷柱六首

廷柱字邦用長樂人弘治己未進士除大理評
事歷官湖廣按察僉事有雙湖集

詩話邦用詩如屏
塵在握淨埽游塵

水亭夜坐

今夜月上遲前夜月上早有月景固佳誰識無月好天
高衆星明涼意在庭草風輕螢照樹夜定魚躍藻毛髮
動蕭爽塵襟滌煩燥時序倏將代浮生嗟易老北鴈今
已南游子在遠道昨夢江田村石林淨如埽獨坐望海
亭把酒看雙鳥

茶園市伍家候大巡

微風散輕陰
日色在雲裏
出郭天氣佳
游衍心自喜
肩輿歷青原
瀾瀾見溪水
農家住林藪
前山若屏几
因話田與桑
欣然憶鄉里

九月六日早發新化

出郭問前路
度溪望千峰
曉雨送薄寒
碧嶂迴秋容
人言秋思悲
我愛山色濃
歸興儻如此
宦情渾已慵
故園黃菊花
正及茱萸鍾
佳節不負人
江海媿浮蹤

過彭澤縣

挂帆過匡廬
檣舟向江縣
彭澤舊知名
淵明今不見
巖松露沾蓋
堤柳風拂面
雖非當時物
過客生愛戀
公如素玉姿
不以緇涅變
又如瑤臺鶴
凡鳥亦知羨
我欲賦弔詞
清詩公所擅
我欲酌一觴
薄酒不堪薦
漲澤曉乘舟
秋濤夜馳傳
區區葵藿心
瑣瑣芹曝善
因公懷昨非
歸里今得便

夜泊石門


斜陽阜林驛
暗月石門橋
雨暴桑難葉
煙村柳未條
客

懷空耿耿春事竟寥寥今夜舟中夢閩山翠欲漂

宿永峰不果踰十里改宿桐林

數程過百里天色已黃昏客問溪頭館農歸樹裏村雞
豚各籬落煙火幾柴門乘夜求安枕桐林更上原

明詩綜卷三十二



總校官庶吉士臣張能照

校對官檢討臣龔大萬

謄錄監生臣賈捷三